

IACOBI SCHALLERI

S. S. THEOL. D. ET P. P. IN ACAD. ARGENT.
CELEBERRIMI

P A R A D O X O N

DE

T O R T V R A
IN CHRISTIANA REPUBLICA
NON EXERCENDA

Oder:

Daß die Tortur in Christlichen Re-
publiquen nicht zu dulden sey?



Ob argumenti curiositatem ac raritatem denuo recusum.

L I P S I A E

APVD IO. CHRISTIANVM SCHROETERVM

A. O. R. M DCC XLII.



ΣΤΝ ΘΕΩ.

PARADOXON

DE

QVAESTIONE PER TORMENTA IN CHRISTIANA REPUBLICA NON EXERCENDA.



Liter *ſ*cri jus tractant, aliter Philoſo-
phi, inquit Cicero 3. Offic. illi, qua-
tenus tenere manu res poſſunt: Philo-
ſophi, quatenus ratione & intelligentia.
Philofophus ergo, ubi rationes non
invenit, ſuſpendit judicium, aut di-
ſputando in utramque partem veritatem, quæ omnium
diſputationum finis eſſe debet, inveſtigat. Occurrunt
autem **NEGATIVAM** in partem rationes non con-
temnendæ.

§. I.

ASILENTIO SS. LITERARVM. Respublica Hebræo-
rum ſatis feliciter adminiſtrata fuit a Moſe, Joſua,
Samuele aliisque piis judicibus: ſic & a Davide, Sa-
lomone, Joſaphato, Hiſkia, &c. & tamen ne veſtigium
quidem invenimus, fontes per Torturam quaſitos. Fuerat
quoque *Populus duræ cervicis. Deut. 31, 27.* & vix hodie tanta
perpetrantur ſcelera, quanta apud Prophetas leguntur.

Ad ista tamen eruenda nulla fuit adhibita tortura: neque ullum deliquium passa est iustitia. Deus ipse, a quo omne iudicium & iustitia in terris, Politiam Judaicam propria sapientia constituit, fuit Legislator, scelerum vindex acerrimus & indagator prudentissimus, nihil de tortura fancivit. Nisi E. crassæ alicujus ignorantia aut oblivionis Deum insimulare velimus, ad minimum statuemus, torturam non esse necessariam. In N. T. & primitiva Ecclesia itemdem altum silentium. Imo Scriptura videtur improbare *Joh. 19, 4.* Pilatus Christum flagellandum curavit; deinde foras adducens dicit: *Vide, adduco eum vobis foras, quod nullam in eo causam invenio.* Quæ verba non incommode sic intelligi possunt. Adduco eum foras, & ne quidem per flagellationem, acre illud per torturam (species enim fuit Veteribus, ut mox patebit ex *Act. 22, 24.*) examen ullius criminis capitalis confessionem ab eo extorquere potui. At quis Christianus Pilati processum libenter imitaretur? Peccavit Pilatus extra controversiam Christum flagellando; vix autem peccasset, si quæstio per tormenta licita fuisset. Dices: Non debuisset ad torturam procedere Pilatus. Resp. At totius populi vox & fama communis est secundum quosdam sufficiens indicium ad torturam: *est testimonium* apud Cic. Topp. cap. 5. Clarius exemplum occurrit in Paulo. *Act. 22, 24.* *Fussit Tribunus Paulum duci in castra, edicto, ut in eum flagris inquiratur: ἵνα ἐπιγνῶ, δι' ἣν αἰτίαν ἔτις ἐπέφωθεν αὐτῷ, ut resciret, propter quod crimen sic clamarent adversus eum.* At Paulus v. 25. protestatur, partim quod sit Romanus, partim quod non liceat *μαρτίζειν ἀκατάκρητον, indemnatum flagellare.* Frustra autem protestaretur, si jure licuisset ante dictam sententiam suspectos per torturam quærere. Patet quoque, fuisse quidem apud Gentiles Romanos torquendi consuetudinem; sed hanc, ut juri meliori obviantem, ab Apostolo Paulo correctam & si ante sententiam exerceatur, repudiatam. Quid, quod & alterum, sc. civem Romanum esse, nobis præbeat argumentum. Si enim

enim Respub. Romana stare potuit & supplicium capitis
sumere de civibus suis, tortura non adhibita, cur non &
in aliis casibus? Zepperus de LL. Mosaicis. l. 5. c. 10. in hæc
verba erumpit. *Omnes in Imperio Romano Germanico Cives
nunc Romani sumus; adeoque eodem adhuc gaudent privilegio
& jure incarcerati, & de crimine aliquo suspecti redditi.* Fru-
stra autem hæc intelliges sine profanarum literarum adju-
mentis. Livius l. 10. meminit legis Porciæ: *Porcia Lex sola
pro tergo civium lata videtur, quod gravi pena, si quis ver-
berasset necassetve civem Romanum, sanxit. Valeria Lex,
cum eum, qui provocasset, virgis cædi securique necari vetuis-
set.* Cæsar in Consultatione de Conjuratis apud Salust.
Catilin. *Quamobrem in sententiam non addidisti, uti prius
verberibus in eos animadverteretur? An quia Lex Porcia ve-
tat?* Ipse Salust. Orat. in Ciceronem Ciceroni graviter ob-
jicit, quod cives Romanos Catilinæ socios indicta causa
contra legem Porciam necasset. *Cum omnia judicia, inquit,
omnes Leges in tua libidine erant: cum tu sublata lege Porcia,
erepta libertate omnium nostrum, vitæ necisque potestatem ad
te unum revocaveras.* Ipse Cicero pro Rabirio perduellio-
nis reo, *Porcia Lex virgas ab omnium civium Romanorum
corpore amovit.* Plinius l. 7. c. 43. de L. Corn. Balbo accusato
refert, quod falso civitatem Romanam usurparet, cum pe-
grinus esset: ideoque *de iure virgarum*, quod in pere-
grinum, non civem erat, *in consilium missum.* Festus re-
fert, illam legem Catonem *pro scapulis appellasse.* *Pro
scapulis*, inquit, *cum dicit Cato, significat pro injuria verbe-
rum.* Quæ ineptissimus in his literis Paulus Diaconus ad-
dit, non est, quod attendamus. Cicero Orat. IV. Catili-
naria etiam *Legis Sempronie* mentionem facit de *Civibus
Romanis* constitutæ, sc. ne quis Civis Romanus, injussu
Populi, multaretur. Optime tamen & clarissime illa in-
telligi possunt ex Ciceronis Accusat. V. in Verrem. Inter
alia capita accusationis erat, quod multos Cives Romanos
virgis ceciderit, in eosque talia supplicia expromserit, quæ

in convictos maleficii servos constituta sunt. Non potes hoc negare, inquit, in foro Lilybæi, maximo conventu, C. Serwiliū Civem Romanum &c. ante tribunal, ante pedes tuos ad terram virgis & verberibus adjectum. Retinenda enim putarunt Romani jura libertatis, non tantum Romæ, ubi Tribuni plebis, ubi cæteri Magistratus, ubi forum plenum judiciorum, ubi Senatus Autoritas, ubi existimatio Populi Romani: sed &, ubicunque terrarum & gentium violatum jus Civium Romanorum, statuerunt, id pertinere ad communem causam libertatis & dignitatis. In seqq. refert Gavii supplicium. Repente Verres Gavium, inquit, proripi, atque in foro medio nudari, ac deligari & virgas expediri jubet. Clamabat ille miser, se Civem esse Romanum, &c. deinde jubet undique hominem proripi, vehementissimeque verberari. Cadebatur virgis in medio foro Messanæ Civis Romanus, cum interea nullus gemitus, nulla vox alia istius miseri, inter dolorem crepitumque plagarum audiebatur, nisi hæc: CIVIS ROMANVS SVM &c. O nomen dulce libertatis! O jus eximium nostræ civitatis! O Lex Porcia, legesque Sempronie &c. apud Ciceron. l. 10. Ep. 32. Asinius Pollio describit Fadii supplicium, qui frustra clamabat: CIVIS ROMANVS SVM. Atque hoc civibus Romanis datum erat privilegium; qui cives non erant, immunes non erant. Sicuti Marcellus Consul colonis, quos Cæsar Novum Comum in Galliam deduxerat, civitatem ademit, & unum illius Cotonie Decurionem, qui Romam venerat, virgis cecidit; addens, hanc se ei inurere notam, quod Civis Romanus non esset. Plutarch. in Cæsar. Interim tamen, si capitaliter a Populo, Senatu aut Principe damnati erant, virgis ante cadebantur, vel flagellationem subibant, tanquam civitatem hoc modo amittentes, qui illam habebant, & ingenuitatem ac libertatem. Ita Nero cum hostis a Senatu judicatus erat, & ut puniatur more majorum, interrogavit, quale id genus esset poenæ, responsum est: nudi hominis cervicem furcæ inseri, corpus virgis ad necem cædi. Sueton. in Neron. c. 49. Galba quo-

quoque Tutorem, quod pupillum, cui substitutus hæres erat, veneno necasset, cruce affecit: *implorantique leges & Civem Romanum testificant, &c.* multo præter cæteras altiorrem statui crucem iussit. Id in Galba. c. 9. Extra hunc casum, Civis Romanus *verberibus cædi vel strangulari non poterat; neque fas erat in eum animadverti, injussu Populi, ut pluribus probat* Brissou. l. 1. felect. ex jure Civil. antiq. c. 13. Atque hoc est, quod Paulus dicit, se civem Romanum & indemnatum flagellari.

Dices: Indemnatus ideo tantum dicitur, non quod torturæ non sint licitæ; sed tantum, quia Tribunus egit contra jus commune & ordinem judiciorum. *Judicia enim criminalia non debent incipere a quæstionibus & Tormentis, ut docent Icri, sed tum demum, si de facto constet & maleficium sit certum.* Tribunus autem propter inconditum clamorem & tumultum factum nondum cognovit. Resp. 1. At dantur casus, ubi ad torturam procedunt, licet de facto certo non constet. E. g. in Latronibus, si cadavera peremptorum abscondunt aut in flumen projiciunt. Si crimen furti, crimen adulterii est aliquando difficillimæ probationis, ideoque sæpe, si de facto constet saltem per conjecturas & præsumptiones, puta per famam, ad torturam procedit iudex. Idque etiam cautum videtur in ordinatione Criminali Caroli V. Imp. art. 6. Erat autem h. l. fama & vox publica cum tumultu; ubi non videtur hic Tribunus plane contra ordinem juris egisse. 2. Vox *ἀνατάξις* non tantum significat nullam facti certitudinem, sed plus, & præsupponit, judicalem sententiam nullam præcessisse. Ut enim vox *κατάκριτος*, contemno præcipue in negotio forensi, ut h. l. includit aliquam per sententiam condemnationem: ita & *ἀνατάξις* est, in quem nulla lata est sententia. Mulier Joh. 8, 11. in adulterio deprehensa factum negare non poterat, neque tamen condemnatur a Christo. Christus noluit sententiam mortis in illam pronunciare, ut lapidaretur. Paulus E. *ἀνατάξις* iniquum judicavit virgis cædi & torqueri ante sententiam.

Obi-

Objiciunt quidam Num. 5, 13. de *potione amara exploratoria adulterii*. Resp. Forsitan sibi imaginantur, *achemenidem aliquam radicem, quæ in vino potato, per cruciatus noxiis confessionem expressit*, ap. Plin. lib. 24. c. 17. § 8. *noctu per varias Numinum imaginationes*. Ista potio nullam habeat convenientiam cum tortura civili. Nam 1. foemina suspecta non ducebatur ad iudicem secularem vel ad forum civile; sed in templum ad forum Ecclesiasticum & ad Sacerdotem. 2. *Nec modus probationis erat civilis*, aqua enim physica sua virtute uterum non scindebat, sed *miraculosus*; quem hodie imitari sine tentatione Dei non possemus. Sicut etiam ista *probatio castitatis per ferrum candens aut duellum* recte ab Ecclesia sublata est. 3. Erat tantum in uno genere delicti sc. adulterii; non in omnibus. 4. Nec erat per modum quæstionis, sed pœnæ; qua statim ejusmodi mulier moriebatur. Sicut ergo Deus propter *συληροκαρδιαν* Judæis concessit libellum repudii: ita & Zelotypia laborantibus subvenire voluit, non ex tribunali, sed miraculo extraordinario.

Ulterius objiciunt: Quamvis in V. T. non usitatae fuerint torturæ; alia tamen fere consimilia media usurpabantur, & *sortes* in dubiis & occultis maleficiis; quorum autores ignorabantur, adhiberi solitas scimus. *Josue 7, 14. 1. Samuel. 14, 3. Jonæ 1, 7.* Resp. 1. Posito, sed non concesso; Interim illæ sortes non tantos in se continebant cruciatus corporis, ipsa pœna graviores, i. e. certas pœnas pro incerto adhuc scelere. 2. Pertinent hæc ad sortes *divinatorias*, quas in usu fuisse non statim ex h. l. probatur. Etiam si quoque probaretur, licitas tamen fuisse, nuspiam apparet, nisi accesserit *Dei speciale mandatum* & certa sic promissio, Deum sortem directurum. Huc referimus 1. exemplum Achan *Josue 7, 14.* ubi Deus mandavit sortem, & hoc ipso promisit, se ita directurum, ut in eum vere cadat, qui quæritur. Neque tamen Josua sorte ista divinitus delinquentem monstrante contentus erat, sed insuper *vers. 16.* pro-

propriam a reo postulavit confessionem. 2. In Saulis facto circa eruendam transgressionem Jonathæ. 1. Sam. 14. 38. Chrysost. sane hom. 14. ad populum putat, sortes divinatorias illicitas fuisse, Dæmonemque instigasse Saulem, ut peccato peccatum addere, ac juramentum male conceptum pejus impleret parricidio Jonathæ. Neque multum ab hac sententia recedunt Veteres Theologi. *Osiander in Paraph. Josuæ exemplum, qui sorte peccatum Achan inquisivit, imitatur externe, sed non eadem pietate. Sunt enim hypocritæ sanctorum hominum simiæ.* Non igitur vult hoc exemplum cum facto Josuæ comparari. Ad preces ad Deum præmissas & eventum respondet *Brentius* hom. 47. p. 533. in h. l. *Oratio sonus est sine mente, & oris est locutio, non fidei precatio. Quid enim mirum, si hypocrita in piorum schola diu versatus, piorum etiam verba & orationes addiscat. Sed inquis, si hæc oratio sine fide est, qui fit, quod Dominus eam audiat? &c. Fecit Dominus, quod rectum erat, & effecit, ut Jonathas deprehenderetur, non quia Saul precatus est, sed quia aliqui, etiamsi nemo precetur, judicium sortis a Deo proficiscitur. Id quod perspicue indicat fors illa a nautis apud Prophetam Jonam missa, illic enim clamant quidem nautæ, sed ad Deos suos fictitios, & nemo inter eos erat, præter Jonam, qui verum Deum coleret, &c. nihilominus tamen fors missa cecidit super Jonam.* Nautarum fors erat divinatoria, secundum plurimos Interpp. illicita: quod si Saulis fors cum hac conveniat, nihil impediet, quo minus hanc quoque divinatoriam & illicitam dicamus; non obstante, quod Deus hanc quoque sortem direxerit ad bonum. Nam & Nebucadnezaris Dæmoniacam sortem *Ezech. 21, 21.* direxit ita, ut Jerusalem puniretur. Etiam si quoque omnia concederentur, tamen nil facerent ad rem. 1. Quia istæ sortes jactæ vel tractæ fuerunt peculiari vel mandato vel instinctu divino. At in Judiciis ordinariis Hebræorum tale mandatum non habuerunt, ut extraordinarias inquirendi vias tentarent. 2. Quia nullus erat, reus etiam præsumtus; effectus offensionis divinæ sc.

& silentii apparebat, delinquens plane ignorabatur, neque humana industria investigari poterat: at in torquendo jam præsupponitur reus ad minimum. 3. Immediate Deus offende-
batur, non proximus. 4. In periculo bonum publicum concernente, non privatum unius vel alterius. 5. Extra-
judicialiter in bello, non in ordinario fori processu. Nam
humana & ordinaria Hebræorum judicia, uti non erant or-
dinata ad occulta judicanda, quæ Deus suo iudicio reserva-
vit; ita etiam non habebant vel mandatum tentandi mira-
culosas inquirendi vias, neque promissum alicujus mira-
culosæ manifestationis aut effectus. Hæc enim sortium
communem rationem excedunt. Unde nullibi legimus,
iudicibus Hebræis sortes vel mandatas vel promissas, nisi
forte *divisorias*. 3. Nautarum fors apud *Jonam* c. 1, 7. erat
divinatoria, superstitiosa, illicita. Deus tamen illam, licet
malam, ita direxit, ut Jonas reus deprehenderetur, cul-
pam agnosceret, & ad Deum rediret. Simili modo dire-
xit omnem superstitiosum Philistæorum *1. Samuel* 6, 9. Si,
inquiunt, *vaccæ arcam Domini vehentes ascendunt contra Beth-
sames; Deus Hebræorum hanc morborum plagam nobis inflixit.*
Hieron. in h. l. Jonæ. *Fugitivus sorte deprehenditur non viri-
bus sortium, & maxime sortibus Ethnorum, sed voluntate
ejus, qui sortes regebat incertas.* Non igitur credibile est,
Iudices Hebræos in suis judiciis sortibus usos ad scelera oc-
cultæ eruenda. Quam ob causam etiam *sortilegia* pro fur-
tis inveniendis in Jure Canonico severe prohibentur, &
clerico transgredienti pœnitentia imponitur. c. in talibus. X.
de Sortilegiis. Ratio peti posset. ex c. fontes. 7. caus. 26. q. 5.
*Sortes, quibus cuncta vos in vestris discriminatis judiciis (quod
Patres damnaverunt) nihil aliud, quam divinationes & male-
ficia esse decernimus. Quamobrem volumus illas omnino damnari,
& inter Christianos ultra nolumus nominari, & ne exerceantur,
sub anathematis interdicto prohibemus.* Deut. 18, 10. omnes hæ
ariolandi & augurandi artes, in quibus etiam Sortilegia con-
tinentur, cum res furto oblata vel similia, verba sunt Osiandri

dri super hunc locum, indicantur, prohibentur & omnibus interdicuntur. *Abominationes gentium* vocat Deus; apud quas sc. legimus *Sortes Lycias, Delias, Prænestinas, Antiati- nas, &c.* Parum etiam ab ejusmodi differunt sortibus, *fer- rum candens* vel *aqua fervens*, quæ in judiciis abesse debere, eleganti ratione ostendit Stephanus Papa 2. quæst. 4. c. con- sultuisti. 20. in medio. *Ferri candentis vel aquæ ferventis exa- minatione confessionem extorqueri a quolibet sacri non censent ca- nones: & quod Sanctorum Patrum documento sancitum non est, superstitiosa adinventione non est præsumendum.* Spontanea enim confessione vel testium approbatione publicata delicta, habito præ oculis Dei timore commissa sunt regimini nostro judicare. Occulta vero & incognita illi sunt relinquenda, qui solus norit corda filio- rum hominum. Atque hæ rationes sine dubio etiam apud Hebræos validæ fuerunt: neque præsumendum, Judices ad occulta eruenda sortibus usos, quibus temeritas & casus, non ratio aut consilium, ut loquitur Cic. 2. de divinatione inest.

Aliter excipit Keckermannus, disp. 32. curs. Phil. q. 4. In vetusta illa Judaica Repub. simplicitas & ingenuitas major erat, utpote in qua homines unius naturæ ac gentis unius- que religionis conformiter vivebant, atque adeo in ea mi- nor rerum confusio erat. Indeque instituta populi illius non adeo accommodata sunt ad Respubl. temporum horum, quibus & malitia & in omne scelus decuplo major libido, & ubi in una, non dico Regione, sed oppido, vico & pago co- habitant homines gentium diversissimarum, atque adeo etiam ingeniorum & morum: Ita ut omnino justitiæ admi- nistrandæ in tanta confusione longe difficilior ratio sit. Resp. 1. An major hodie malitia sit, quam Judæorum tempore, me- rito dubitare possumus, si conciones & querelas Prophetarum expendamus. Sedebat Populus Judaicus inter varias gentes, habebat ex illis servos & ancillas, mercimonia cum illis exercebat; hinc factum, ut vitia omnium vicinarum gentium paulatim attraxerit. Quoties enim legitur am- bulasse secundum *viam gentium*, juxta *abominationes gentium*.

Hinc *Sadomitibus* *torabiliore* assignat *pœnas* Salvator *Matth.* 11, 24. & *Ferem.* 23, 14. omnes comparat *Sodomæ incolis*; imo peccata *Judæorum* *majora* dicit, quam *Sodomorum* *Thren.* 4, 6. Clarissimus quoque locus extat *Ezech.* 16, 48. *seqq.* ubi Deus *Sodomæ* & *Samarie* peccata *leviora* pronunciat, quam *Judæorum*. 2. *Judæi* fuerunt unius naturæ & gentis homines vix aliter, quam ut Tacitus *Germanos*, in *Germ. c. 2. n. 1.* credit indigenas, minimæque aliarum gentium adventibus & hospitibus mixtos. Ut autem diversæ in Regno sunt provinciarum genio distinctæ: ita apud eos erant Tribus, quæ dialecto, ut *Ephraimitæ* *Jud.* 12, 6. differebant, ceu hodie superioris & inferioris Germaniæ incolæ; quin etiam genio & natura, quantum ex benedictione Jacobi *Gen.* 49. aliisque Populi Israelitici descriptionibus colligere est. Religione quoque post Salomonis tempora, discrepabant, & quamvis Hierosolymæ externus cultus fuerit retentus: tamen populus ad Idololatriam pronus peculiaribus sibi faciebat sacra, secundum numerum civitatum Dei tui &c. *Ferem.* 11, 13.

§. II.

AB EXEMPLIS ALIARUM RERUM PUBLICARUM in regno Arragoniæ torturam ignotam esse, *Gomesius* testatur tom. 3. resolut. c. 13. a princ. ut & in Regno Angliæ. *Thom. Schmith.* l. 2. de Rep. Angl. c. 27. Equuleo aliquem torquendum subicere, ut inter confessionem crimen elicias, præter morem gentis Anglicanæ est, & servile aliquid sapit. Nam quæ in re Reipubl. unquam inserviverit, qui membra sic protensa atque ultra justam mensuræ longitudinem producta habuerit? nam si infontem esse contingat, quæ par esse potest compensatio, ut illi de injuria satisfiat? si mori oporteat, quod genus feritatis est, ipsum prius excarnificare. Etenim expressa per tormenta confessio nihili aestimatur. Cum autem Angli hi descendant a Germanis, verisimile est, Torturam non per multa secula apud Germanos quoque esse in usu. *Lud. Vives* comm. in l. 19. Augustini de C. D. c. 6. Quomodo vivunt tam multæ gentes & quidem barbaræ, ut Græci Latinique putant, quæ ferum & imma-

immane arbitrantur, torqueri hominem, de cujus facinore dubitatur.

§. III.

A PRIMA ORIGINE. Quæstionem per tormenta plerumque Tyranni introduxerunt ad stabiliendam dominationem, & eruendos puniendosque, quos suæ Tyrannidi imminere suspicabantur. Polyd. Virg. *Nimrothum* primum inventorem facit l. 2. de rer. invent. cap. 3. Apud *Josepb. de imperiorationis*. Antiochus Epiphanes torturæ Judæos subjecit. In Romanam Civitatem ad Sextum Tarquinium Superbum, dignum scilicet Autorem, quem imitemur, respicere videtur Lud. Viv. in *August.* l. 19. de C. D. c. 6. & cōsentiit Gotfridus Viterbiensis Chron. part. 10. *Iste* sc. Tarquinius prius excogitavit carceres, & omnia genera tormentorum. At in nece Tarquinii Prisci ante Tarquinium superbum Parricidas tormentis admotos, & insidiarum Autores prodere coactos fuisse, constat ex Dion. Halicarnas. l. 3. in fine. Cicero in Partit. Orat. c. 16. *Atheniensium & Rhodiorum institutis accenset*, apud quos etiam liberi homines (id quod acerbissimum) civesque torquentur. At Atheniensium & Rhodiorum Respubl. erant imperfectissimæ, pluribusque vitiis laborabant.

§. IV.

A PROPORTIONE QUÆSTIONIS ET POENÆ. Ipsa ratio dicitur, quæstionis dolorem non debere majorem esse, quam dolorem poenæ ordinariæ. At longe gravior est tormentorum dolor, quam si quis supplicio afficiatur, quod plerumque cito perficitur & stuporem sensuum secum trahit. Cassiodor. l. 3. Ep. 46. *gratius est, spem citæ mortis expetere, quam tormentorum crudelia sustinere: inter supremas enim anhelantis angustias, votum est potius perire, quam vivere.* Ludov. Viv. in *Augustini* l. 19. de C. D. c. 6. *Nos sic torquemus homines, ne infantes moriantur, ut magis eorum nos misereat, quam si morerentur: usque adeo graviora sunt sæpe tormenta, quam mors.* Etiam si quoque exantlatis

constanter torturæ doloribus innocentes deprehendantur, non potest illis æquivalens fieri retributio; quippe membra omnia, artus, muscoli, nervi luxati, fracti, ut per totam reliquam vitam miserrime vivant, ad omne genus vitæ & opificium inepti, & vitæ ipsa ipsis potius sit supplicium, cum mors fuisset solatium. Synesius sane Ep. 58. *feliciores prædicat, qui mortui fuerunt, quam qui tormentis male fuerunt liberati.* Ut E. recte iudex in suppliciis, se non præcipitat, quia *pœna dilata exigi, exacta revocari non potest* Senec. 2. de Ira c. 23. Ita rectius tormenta intermittit, quia si quis innocens deprehensus sit, non patet ei ad pœnitentiam regressus. Addimus illud Quintiliani Declam. 18. *Unicum filium pater ignibus verberibusque interrogas, rogo, quid facturus, si pernegaverit? Vide licet ut laudes, deinde dimittas, ut amplectaris perusta vitalia, & laceri pectoris vulnera pietati rursus admoveas. Solus supereſt pudor homini, qui torſit unicum, ut torquere debuerit. Faciat necesse est, res ista te pessimum Patrem, & oderis oportet filium,* CUI SATISFACERE NON POSSIS. Dicunt quidem Patroni torturæ, reos ita torquendos, ut vel innocentia, vel supplicio salvi sint: sed modi isti homines torquendi vix tale quid admittunt: præcipue si tortura aliquoties repetatur. Claudimus hoc argumentum verbis Senecæ. l. 2. de benef. c. 5. *acerbissima crudelitas est, quæ trahit pœnam, & misericordiæ genus est, cito occidere, quia tormentum ultimum finem sui secum trahit; quod antecedit tempus, maxima venturi supplicii pars est.* Immisericordiæ E. genus est, minutis ictibus & longis torturæ cruciatibus homines dilacerare, sensum mortis præbere, non ipsam. Inter Caligulæ sævitiam refertur apud Suetonium, quod *non temere in quenquam animadverti passus sit, nisi crebris & minutis ictibus, perpetuo notoque præcepto: Ita feri, ut sentiat se mori.* Hieronymus tom. 1. in vita Pauli Eremitæ ab init. *Hostis callidus tarda ad mortem supplicia conquirens, animas cupiebat jugulare, non corpora. Et ut ipse, quia ab eo (Decio Imp.) passus est,*
Cypri.

Cyprianus ait, *volentibus mori, non permittebatur occidī.*
 Lucanus quoque in consuetudinem illam favam invehitur.

- - moremque nefandae

Dirum scēvitiae, pereuntis parcere morti.

Prudentius in Laurentio Martyre:

Perire raptim non dabo,

Vitam tenēbo & differam,

Pœnis morarum jugibus,

Et mors inextricabilis

Longos dolores protrahet.

illi apud Petronium. *Si quid tristius paras, celerius confice,*
neque enim tam magnum facinus admisimus, ut debeamus torti
perire. Sensere sc. hi cruciatus, quibus fontes exercentur,
 ipsa morte acerbiores esse, & speciem crudelitatis ostē-
 dere. Inter alia Crimina Verri objecta Cicero Verr. 5. &
 hoc habet, quod liciti fuerint Parentes cum lictore, ut uno
 ictu securis afferret mortem filiis suis. *Quid dabis, inquit*
lictor, ne diu crucietur? ne sæpius feriat? ne cum sensu
doloris aliquo, aut cruciatu spiritus auferatur. Etiam ob hanc
 causam pecunia lictori dabatur. O magnum & intolerandum
 dolorem! O gravem acerbamque fortunam! non vitam libero-
 rum, sed mortis celeritatem pretio redimere cogebantur Pa-
 rentes. Atque ipsi etiam adolescentes cum Sestio de eadem plaga
 & de uno illo ictu loquebantur, idque postremo Parentes suos
 liberi orabant, ut, levandi cruciatus sui gratia, lictori pecunia
 daretur. Ex quibus ulterius illud quoque deducimus, si
 species crudelitatis est, etiam meritos mortem, de quo-
 rum facinore jam constat, tam longis cruciatibus affligere;
 quid statuendum de torturis, ubi delictum nondum con-
 fessatum, sed per quæstionem demum inquirendum est.
 Neque abnuunt Baldus & Paris de Puteo apud Wesenbe-
 cium l. c. n. 5. quæstionem corpus lacerare & ipsa fere morte
 duriorē esse, & post n. 12. circ. finem torturam sæpius repe-
 titam non minorem pœnam esse re ipsa, quam cujuslibet pœna
 capi-

capitalis. Si Tertullianum evolvamur ad Martyres, deprehendemus, Christianos Martyres non tam mortem exhoruisse, quam tormenta. Sed *mortis metus*, inquit, *non tantus est, quantus tormentorum.* Senferunt sc. mortem tolerabiliorem esse ipsis tormentis, maluisseque mori, quam torqueri. Idem Cyprian. asserit Ep. 53. ad Fortunatum de iis, qui per tormenta superantur, sc. *in praelio congressos & vulneratos, per imbecillitatem carnis, confessionis suae coronam non potuisse perferre: maxime cum cupientibus mori non permetteretur occidi, sed tamdiu fessos tormenta laniarent, quam diu non fidem, quae invicta est, vincerent, sed carnem, quae infirma est, fatigarent.* Simonides apud Ammian. Marcellin. l. 29. c. 9. *cum causam non ex veritate, sed quaestoris nutu pensari sensisset, ultro fassus est crimen, morique maluit, quam torqueri:* ita & Maximus ibidem c. 10. rem audivisse & reticuisse confessus est, ideoque *capite truncatus, sensit docente periculo extremo, quaestoris iniquitatem omnibus esse criminibus graviolem.* Addamus Synesium Ep. 58. *Horrenda ad carnificinam instrumentorum genera, quorum qui experimentum ac spectaculum morte praevenierunt, quique ante bello sublati sunt, ab iis, qui male liberati fuerunt, felices sunt praedicati.*

S. V.

A DEFECTU LIBERTATIS. Veritas sive consideretur ut *actus Iustitiae*, qualis illa, quae judicialiter deponitur, sive ut *actus veracitatis* extrajudicialiter, debet profluere ex certa scientia & libera voluntate; alias actus virtutis non erit. At ejusmodi veritas, quam dolor tormentorum extorquet, neque ex judicio intellectus, utpote dolore turbato, neque ex voluntate libera proficiscitur; nisi forsan gratia Dei extraordinaria accedat: sicuti Augustinus l. 13. de C. D. c. 7. constantiam Martyrum ad abundantiam gratiae divinae, ad opitulationem divinam, non ad vim propriam refert. Ut ergo Judex si non ex certa scientia juris, sed vel ex amore aut odio procedit, etiamsi justam pronunciet sententiam, non

non tamen iuste facit: ita & Veritas non pro veritate censenda, quæ dolore elicitur. Philotas apud Curtium doloribus impar Craterum compellat: DIC, QUID ME VELIS DICERE? Ita torti tormentorum tandem finem petentes, dicunt, quæ Quæsitores dici volunt. Pertinet huc locus Ciceronis Orat. pro Sylla; *t tormenta gubernat dolor, moderatur natura cujusque tum animi, tum corporis, regit quæsitior, flectit libido, corrumpit spes, infirmitas metus, ut in tantis rerum angustiis nihil Veritati loci relinquatur.* Recte prudens Minus ait: *Etiam innocentes cogit mentiri dolor.* Repugnat etiam principiis philosophicis in doctrina de actionibus ex metu Philosophus 3. Eth. 1. actus ex metu mixtos facit, qui non ex toto sunt spontanei, multo minus liberi & electitii: sed ex parte inviti. Hinc & actus ejusmodi ex metu gesti pro nullis habendi & rescindendi sunt. Vix autem gravior est metus aut cruciatus, quam qui per tormenta & quæstiones corpori infertur. Nobilis locus est caus. 15. quæst. 6. c. 1. *Si quandoque a Sacerdotibus & auctoribus Ecclesiæ quædam scripturæ quoque modo per metum aut fraudem, aut per vim extortæ fuerint, vel ut se liberare possint, quocunque ab eis conscriptæ, aut roboratæ sint ingenio, ad nullum ejus præjudicium, aut nocumentum valere censemur: neque ullam eos infamiam vel calumniam aut a suis sequestrationem bonis unquam, Deo Auctore, & sanctis Apostolis eorumque successoribus, sustinere permittimus.* Confessio vero in talibus non compulsæ, sed spontanea fieri debet. Omnis enim confessio, quæ fit ex necessitate, fides non est: Confessio vero in talibus non extorqueri debet, sed potius sponte profiteri. Pessimum enim est, de suspitione aut extorta confessione quæquam judicare, cum magis sit inspector cordis Dominus, quam operis. Non potest autem humano condemnari examine, quem Dominus suo reservavit iudicio, &c.

Quamvis autem non omnis metus hic intelligatur, sed talis, qui cadit in constantem vitum: tamen omnium Canonistarum consensu *metus moris, & qui continet cruciatus*

corporis, sunt tales, qui virum constantem de statu suo dimovere possunt. conf. Glos. ibid. Minutius Felix circa finem, cum pueros & mulierculas Christianorum cum Mutio, Aquilio, Regulo comparasset, tandem ait, folio m. 26. Nec intelligitis, o miseri! esse qui aut sine ratione velit pœnam subire, aut tormenta sine Deo POSSIT sustinere. Sensit, tormenta ita esse comparata, ut constantiam humanam superent & non nisi divinitus inspirato robore sustineantur. Wesemb. c. l. n. ii. est ab eo inchoandum, qui timidissimus. Hunc enim facile Verum metu tormentorum dicturum. At quid si dicerem, timidissimum facile? falsum metu tormentorum dicturum? Ad minimum hanc veritatem non esse actum iustitiæ.

Quis enim non moveretur ad atrocem istam tragediam, cum intenduntur eculei, expeduntur pondera plumbea, cum fidiculis & verberibus, resultant omnia truculentæ vocis horroribus, inter catenarum sonitus, tene, claude, comprime, abde, ministris officiorum tristem clamantibus, ut vel sola cogitatione animo repræsentata hominem interficere possent, ut saliam ibid. qui cum de vinculis educitur audiendus, & calceo inserit pedem, quasi ruina incedentis immensi terroris repente percussus animam, inter retinentium manus, efflavit. Recte itaque Seneca. Ep. 12. Plus agit tortor, quo plura instrumenta doloris exposuit. SPECIE enim vincuntur, qui patientia resistissent. Nec minus Quintilian. declam. 18. Omnium incertorum suspiciones pessime semper a corporibus incipiunt, nec bene de cujusquam moribus illam partem hominis interroges, quæ non animo sed dolore respondet, & declam. 272. ubi tantum robur animi, ubi tam firmam solidamque mentem, quæ non dolore vincantur, non ignibus cedat, non verberibus ingemiscat.

§. VI.

A DEFECTU CERTITVDINIS. Per ejusmodi tormenta tam verum, quam falsum elici potest. Accidit enim ut quis victus doloribus crimen fateatur, quod non commisit.

misit. Hieronym. tom. 1. Ep. ad Innocent. memorat de muliere adulterii accusata cum juvene commissi a Marito, Juvenis tormentorum impatiens crimen, quod non patrarat, fassus est, ideoque occisus: mulier miraculo servata. Valerius Max. l. 8. c. 4. simile exemplum narrat de M. Agrii servo. Huc referimus Philotam apud Curtium VI. 21. de quo dubitatum, *verone an mendacio liberare se a cruciatu voluerit, quoniam & vera professis & falsis dicentibus idem doloris finis ostenditur, & lib. 7. 2. 34. Philotas ultimis cruciatibus victus, verane dixerit, quæ facta probari non poterant, an falsis tormentorum petierit finem, re quoque recenti, cum magis possit liquere, dubitatum est.* Recte Autor. 2. ad Herenn. cap. 1. putat, *dolori credi non debere, quod aliis alio reticentior sit in dolore, quod ingeniosior ad comminiscendum; Quod denique sæpe scire aut suspicari possit, quid quæsit vellet audire: quod cum dixerit, intelligit sibi finem futurum doloris.* Econtra evenit, ut quis crimen, de quo quærebatur, non fateatur, ut apud eundem Val. Max. c. Fannii servus sexies tortus pernegavit. Ita Fulvii Flacci servus octies tortus nullum omnino verbum, quo Dominus perstringeretur, emisit. Est sc. hoc, quod & Tacitus habet. H. l. 32. *contumax etiam adversus tormenta servorum fides.* ap. Ammian. Marcell. l. 29. c. 9. *Pasiphilus crudeliter tortus de statu robustæ mentis non potuit deturbari, ut Eutropium Asiæ Proconsularem in justo mendacio perverteret.* Clarissimus pro utraque parte extat locus apud Tacit. A. XIV. 60. 3. *Actæ de ancillis, sc. Octaviæ, quæstiones, & vi tormentorum victis quibusdam, ut falsa annuerunt, plures perstiteræ sanctitatem Dominae tueri.* En quædam ad placitum locutæ vi tormentorum, sed mentitæ sunt: a reliquis nullis tormentis extorquere potuit, quod volebat iudex. Recte iterum Cicero in Partition. c. 9. quæstiones removet, quod & dolorem fugientes muli in tormentis ementiti persæpe sunt, morique maluerunt falsum fatendo, quam vere inficiando dolore: multi etiam suam vitam neglexerunt, ut eos, qui his chariores, quam ipsi

sibi essent, liberarent. Alii autem aut natura corporis, aut consuetudine dolendi, aut metu supplicii, aut mortis, vim tormentorum pertulerunt. Alii ementiti sunt in eos, quos oderant. Huc trahi potest quæstio, quæ de conjuratione in caput Hieronymi Syracusanorum Principis habita est. Theodorus comprehensus, quamvis de se haud cunctanter omnia fassus, ad indicandos consilii socios Andronodoro datur torquendus: tandem omnibus intolerandis patientiæ humanæ cruciatibus laceratur: victum malis se simulans, avertit a consciis in insontes indicium: Thrasonem esse autorem consilii, mentitur. Liv. l. 24. Valerius Max. l. 3. c. 3. explicat. Quin etiam satellitem, in quo totius dominationis summa, quasi quodam cardine versabatur, falsa criminatione inquinando, fidum lateri ejus custodem eripuit: beneficioque patientiæ, non solum, quæ occulta fuerunt, textit, sed etiam tormenta sua ultus est. Quibus Hieronymus, dum inimicum cupide lacerat, amicum temere perdidit. Eodem modo Zeno Eleates a Phalari tortus, ut consilii participes ederet, nec nominavit quempiam, sed proximum quemque ac fidissimum tyranno suspectum reddidit. *ibid. conf. & Suidam, Laërt. Ciceronem 2. Tusch.*

Nec tantum innocentium hæc laus, sed & consciis sceleris & fontes adversus tormenta contumaces sunt. Confer in Tac. A. XV. 57. 2. exemplum Epicharis, *quam non verbera, non ignes, non ira eo acrius torquentium, ne a fœmina spernerentur, pervicere, quin objecta denegaret; torqueri & mori maluit, quam Quæstori conscios prodere.* Jungere huic Græcum possemus *Sambicum*, qui annum perpetuum exquisitis cruciatibus est dilaceratus, inter quos & animam efflavit; nec tamen conscios judici nominavit. Vid. Erasmi Adag. Graviora Sambico. Applicemus huc, quibus fœminam illam tortam Seneca depingit. l. 2. *controv. V. ut mariti secreta proderet. Explicantur tyrannicæ crudelitatis adversus infelicem fœminam apparatus, & alia instrumenta, viro-
rum*

rum quoque animos ipsos visu frangentia, ad excutiendam muliebri pectori constantiam proponuntur: instat tam denunciatio-
nibus, quam tormentis tyrannus & minando torquet. Tacet. Videt intentum Tyranni vultum, videt oculos minaces, & ta-
cet, &c. Ceduntur flagellis artus, verberibus corpus abrum-
pitur. Tacet &c. Vicerat sævitiam patientia, deerat jam san-
guis, superabat fides. Illustratur quoque exemplo Cappa-
docum, qui a pueris se mutuo torquere equuleo solent, ut ad falsa se testimonia venundare possint: quemadmodum scribit vetus Persii Interpres in Sat. VI. item Zenonis Eleatæ, qui nullis potuit tormentis adigi, ut conscios delendæ ty-
rannidis indicaret apud Laërtium in vit. Seneca Epist. 78. cum multa contra dolorem differuisset, tandem hoc quo-
que argumentum profert. Plus est *flamma* sc. quam dolor, & equuleus, & lamina, & vulneribus ipsis intumescantibus, quod ille renovaret & altius urgeret impressum. Inter hæc ta-
men alius non gemit: parum est, non rogavit: parum est, non respondit: parum est, risit, & quidem ex animo. Cum Syl-
vanus Majestatis in Constantium Cæsarem commissæ accu-
saretur, Proculus inter ipsius familiares, homo gracilis & morbosus, eculeo cum admooveretur metuentibus cunctis, ne vi magna tormentorum, levi corpore fatigato, reos cri-
minum promiscue citari faceret multos: contra quam spe-
ratum est, contigit. Is enim, inquit Ammian. Marcell. l. 15. c. 16. *quamvis ad confinia ipsa mortis vexatus, nec nomi-
navit, nec prodidit aliquem.* Tertull. ad Martyr. cap. 4. & Apolog. circa finem meminit meretricis Atheniensis, quæ consciæ conjurationis, cum propterea torqueretur a tyranno, & non prodidit conjuratos, & novissimi linguam suam comestam in faciem tyranni expuit, ut nihil agere se scirent, tormenta etsi ultra perseverarent. Nomen meretrici fuit Leana, de qua Plin. l. 7. cap. 23. Pausanias in Atticis. Plura exempla vide apud Valer. Max. l. 3. c. 3. de servo barbaro, qui Asdruba-
lem interemit; de Anaxarcho, ut & de homine agresti, qui L. Pisonem adortus est. ap. Tacit. IV. A. c. 45.

Atque ex hoc fundamento respondemus instantiæ Michaëlis Montani l. 2. des Essaias c. 5. qui putat, conscientiam scelere gravatam vix parem esse doloribus ferendis, innocentiam contra ultro deponere tormenta. *ie pense, ait, que le fondement de ceste invention vient de la consideration de l'effort de la conscience.* &c. Resp. non negamus, magnam vim inesse conscientiæ: at præsentior est metus mortis, si fateatur. Externa enim quæ sensibus viciniora sunt, fortius animum percellunt, quam quæ in mente hærent. Est autem *mors terribilium terribilissimum* 3. Eth. c. 6. & sapius conscientiam superat, ut homines id agant, quæ contra conscientiam sunt. Ratiocinatur enim cum isto nebulone, cujus mentionem facit Marsil. c. f. repetit. 25. *melius esse millies torqueri, quam semel gulam frangi, illud damnum per Chirurgum curari posse, hoc nunquam.* πάντων τῶν δεινῶν ὁ φόβος μάλιστα καταπλήττει τὰς ψυχάς. Metus inter omnes res terribiles maximo impetu animos percellit. Xenoph. l. 3. Cyropæd. p. 67. Accedit dolor, qui non in animo, ut conscientia, sentiuntur, sed corpore. *Anglis* inquit Schmith. de Rep. Angl. l. 2. c. 27. innatum est, ut mortem spernant, cruciatum non ferant, idcirco potius quidvis a se gestum profitebuntur, etiam Patris sui internecionem, quam ut cruciatui huic obnoxii amplius esse velint. Referre huc possemus *Epistolam Hieronymi tom. 1. ad Innocentium de muliere septies icta* Accusata mulier a Marito adulterii cum juvene. Hic volens compendio mortis longos cruciatus vitare in semetipsum mentitus est. Mulier perstitit negare. Ultra pars bonam habebat conscientiam. Sed altera impar doloribus, altera par fuit. Epistola prolixior est, quam ut describenda sit. Huc possemus adferre lapsos in primitiva Ecclesia, quibus ne optima conscientia constantiam inspirare potuit.

Ad Ecclesiasticam historiam si nos conferre vellemus, plurima ex Eusebio aliisque adduceremus exempla S. S. Martyrum, qui nullis tormentis, quamvis crudelissime lacerati, compelli potuerunt ad id, quod iudices desiderabant.

bant. Ipse Plinius, Ethnicus Epist. 97. testatur, *nihil cogi posse, qui sunt revera Christiani.* Cyprianus Sermon. 5. de lapsis. Non præscripta exilia, non destinata tormenta, non rei familiaris damna & corporis supplicia terruere. Id. Ep. ad Martyres. *Tolerastis usque ad consumationem gloriæ durissimam Quæstionem, nec cessistis suppliciis, sed vobis potius supplicia cesserunt. Finem dolorum, quem tormenta non dabant, coronæ dederunt. Laniena gravior ad hoc diu perseveravit, non ut stantem fidem dejiceret, sed ut homines Dei ad Dominum vel ocius mitteret, &c. Vidit. admirans præsentium multitudo cæleste certamen Dei, spirituale certamen, prælium Christi; stetisse servos ejus voce libera, mente incorrupta, virtute divina, telis quidem secularibus nudos, sed armis fidei credentes armatos. Steterunt torti torquentibus fortiores, & laniantes ungulas, pulsata & laniata membra vicerunt. Inexpugnabilem fidem superare non potuit sæviens diu plaga repetita, quamvis rupta compage viscerum, torquerentur in servis Dei non jam membra, sed vulnera.* Id. de laude Martyrii. *Quantæ sit gloriæ ponderate, hujus vitæ cupiditatibus atque ab omni animum natura mundique commercio segregatum, contra adversantis discrimen opponere, nec sævitiam torquentis horrere: animari hominem dolore, quo credatur extinguere & id sibi in augmentum virtutis assumere, quod cruciatui putat prodesse, qui punit. Nam prædurantibus licet costis resultans ungula recurrat in vulnus & euntibus flagris cum avulsa corporis parte rediens habena ducatur; stat immobilis tamen pœnis suis fortior. Similia habet Theodoretus Θεοδωρ. l. de Martyribus. Nazianzenus Orat. in Julian. cum Marci Arethusi Martyrium describit, maxime Eusebius in Histor. Eccles. passim. Taceo jam Martyres audaculos: Circumcelliones profero, qui se temere & sponte ad Martyria & tormenta offerebant, & spernendo tormentorum dolores, docebant, tormenta non esse idoneum veritatis inquirendæ medium. Montanistæ, apud Eusebium. l. 5. H. E. c. 15. jactitabant, se non paucos habere martyres, &c. sic & aliarum hæresium propugna-*

*pugnatores per multos venditant se habere martyres: non tamen veritatem penes se tenere fatehimur: primi ex Marcionis heresi Marcionistæ vocati sunt, permultis se Christi martyribus abundare prædicant, &c. Alii contra victi tormentis ore negarunt non aninio, Tertull. Apolog. Edit. Rhenan. p 808. Unde ista perversitas? ut etiam illud non recogitatis, sponte confessio magis credendum esse, quam per vim neganti, vel ne compulsus negare, non ex fide negaverit, & absolutus ibidem post Tribunal de vestra rideat emulatione iterum Christianus. Non sane putavit, tormenta viam esse, qua iudex possit ad veritatem & certitudinem penetrare. Pertinet huc Epistola Cypriani 53. ad Fortunatum, & alios collegas, de iis qui per tormenta superantur. Puto his indulgentiam Domini non defuturam, quos constat stetisse in acie, nomen confessos esse: violentiam magistratuum & populi furentis incursum immobiles fidei obstinationem vicisse, passos esse carcerem, diu inter minas Proconsulis & fremitum populi circumstantiis, tormentis laniantibus ac longa iteratione cruciantibus repugnasse, &c. in novissimo tamen infirmitate carnis subactos. Idem de Lapsis. Lapsus potest rogare & dicere. Certare quidem fortiter volui, & sacramenti mei memor devotionis ac fidei arma suscepi: sed me in congressione pugnantem cruciamenta varia & supplicia longa vicerunt. Stetit mens stabilis & fides fortis, & cum torquentibus pœnis diu anima immobilis luctata est: sed cum durissimi iudicis recrudescente sævitia jam fatigatum, jam lassum corpus, nunc flagella scinderent, nunc contunderent fustes, nunc equuleus extenderet, nunc ungula effoderet, nunc flamma torreret: Caro me in colluctatione deseruit, infirmitas viscerum cessit, nec animus sed corpus in dolore defecit. Quoties horum lapsorum recordor, incidit illud Apostoli. 1. Cor. 10, 13. de tentatione non nisi humana. Nondum initium sumserant illæ persecutiones Christianorum, nondum tortores experti erant, nondum *μέχρις αἵματος* Hebr. 12, 4. usque ad sanguinem resistebant. At cum jam in Christianos expediebantur omnia tormentorum*

torum genera, cum ad sanguinem usque resistendum erat, illud erat *ἐκ ἀνθρώπων*, non humanum vel supra hominem, nec poterant humanis viribus ea sustinere Christiani, sed cogebantur ad nutum tortoris non veritatem, quam tamen quærit tortor, dicere, sed mentiri. Qui tormenta superarunt, illis assignat Augustin. l. 13. de C. D. c. 7 non vim propriam, sed *opitulationem divinam*. & Cyprian. Ep. 9. ad Martyres, virtutem divinam, id est, gratiam extraordinariam. Extant quoque Petri Alexandrini Episcopi Canones ap. *Balsam. in Nom. in fin.* qui accurate distinguunt inter lapsos post tormenta, & sponte ruentes. Illos sic describit. *Delati sunt, in custodiamque coniecti, tormenta non sufferenda & intolerabilia flagella, & multas alias graves necessitates sustinuerunt: postea autem sunt a carnis imbecillitate proditi &c. multum decertarunt & diu resisterunt. &c.* Illustrare hæc possemus exemplo Origenis, apud Eusebium l. 6. c. 2. & 3. *cujus animum tanta cupiditas occupavit Martyrii, ut prope se ultro offerret periculis, &c. perfecisset etiam, nisi Mater omni ejus vestitu clam ablato, domi eum manere necessario coëgisset.* At hic fervor postea deferbuit, sensit tormenta, non per tulit. Euseb. l. 6. c. 32. Qualia & quam acerba pro Christi verbo perpeffus est vincula, quæ corporis tormenta, quæ supplicia, ex catena ferrea in interioris carceris recessu collo impacta, & quomodo permultis diebus pedes ad compedes ligneas intrusi, quatuor foraminum interstitiis interpolitis, distractione distenti fuerint: quæ ignis & incendii minæ &c. At quid postea? Si vera sunt, quæ Epiphani. hæc. 64. habet, non permanserunt illi, quæ ad præmium consequendum pertinent, in finem. &c. idolis tandem sacrificavit, & a confessoribus ac Martyribus re cognita rejectus est. Inde Alexandria non potens ferre exprobrantium sanas discessit & Palæstinam inhabitare elegit. Quin adsit ipse Ulpianus, qui 7. libros de torquendis Christianis non ad historiæ fidem sed ad suppliciorum acerbicatem scripsit, l. 1. §. quæstioni 23. ff. de quæstionibus. *Quæstio res est fragilis,*
D inquit,

inquit, & periculosa & quæ veritatem fallat, nam plerique patientia sive duritia tormentorum ita tormenta contemnunt, ut exprimi illis veritas nullo modo possit: alii tanta sunt impatientia, ut quodvis mentiri quam pati tormenta velint. Cur autem ad tam durum modum homines interrogandi veniret iudex, si est fragilis & fallax. Et quid aliud agunt hodierni Jcti, qui tam operose, solícite, curiose & trepidanter hanc materiam tractant, quam quod Judici hoc Quaestionis genus suspectum reddant, ut deinde in conscientiae foro sibi ipsi satisfacere nequeat, sed dubitare cogatur. Eodem modo loquitur tit. 50. §. 23. lib. 60. βασιλικῶν. Propter audaciam vel formidem. τῶν βασανιζομένων ὃ πάντοτε δὲ πεισέειν, ἢ ἀπιστεῖν τοῖς καταθέσει αὐτῶν, eorum, qui Quaestioni subjiciuntur, non semper est confessionibus eorum habenda aut non habenda fides. Scholiastes Græcus addit. ἀσθενὴς καὶ, ἐπικίνδυνός ἐστι καὶ τὴν ἀληθείαν ἔσθωτε ἀπατεῖ καὶ πλανῇ. fragilis & periculosa est questio & veritatem plerumque fallit.

§. VII.

AB OFFICIO JUDICIS. Judicem non debere ex suspicionibus judicare extra controversiam esse putō. Patet illud 1) ex Deut. 17, 4. Si scelus aliquod renunciatum tibi fuerit atque audieris, inquireito diligenter: ac si vera & certa fuerit res illa, &c. 2) ex ratione, quia omne iudicium, si est actus justitiæ, fluere debet ex recta ratione. At suspicio non est recta ratio; 3) ex exemplis. Sit unum de Pausania apud Nepotem in Pausan. Spartani non putabant de Pausania, claro viro suspicionibus oportere judicari. Consentiant leges, quas ut alienas omittimus. At quæso, quæ tormenta Judicem certum reddere possunt, reum dolore & equuleo coactum vera dixisse & non mentitum fuisse? Mentuntur plerumque torti, Quintil. declam. 379. Adsit tamen magnus ille Episcopus Hipponensis Aurelius Augustinus l. 19. de Civ. Dei c. 6. cui uni malim credere, quam centum ejusmodi, qui de torquendis Christianis scripserunt, Ethnicis. Notamus hic Augustinum Papiniano, Ulpiano, Paulo, Modestino fuisse

fuisse posteriorem per integrum seculum cum dimidio: adeoque horum doctrinam de præsumtionibus violentis, semiplena probatione &c. vel ex sola praxi ipsi non fuisse incognitam. Quid autem dicit? Hi judicant, qui conscientias eorum, de quibus judicant, cernere nequeunt &c. Quid cum in sua causa quisque torquetur: & cum queritur, utrum sit nocens, cruciatur, & innocens luit pro incerto scelere certissimas pœnas: non qui illud commississe detegitur, sed quia non commississe nescitur. Ac per hoc ignorantia judicis plerumque est calamitas innocentis. Et quod est intolerabilius, magisque plangendum, rigandumque, si fieri posset, fontibus lachrymarum, cum propterea iudex torqueat accusatum, ne occidat nesciens innocentem, sit per ignorantie miseriam, ut & tortum innocentem occidat, quem ne innocentem occideret, torserat. Si enim secundum istorum sapientiam (veramne & non simulatam) delegerit ex hac vita fugere, quam diutius illa sustinere tormenta: quod non commisit commississe se dicit. Quo damnato & occiso, utrum nocentem an innocentem iudex occideret, adhuc nescit: quem ne innocentem nesciens occideret, torfit: ac per hoc innocentem, ut sciret, torfit: & dum nesciret, occidit &c. Jungimus Ethnicum Quintil. declamat. 18. Excedit omnem immanitatem, filium ideo torquere, ut scias, an innocens torqueatur. Huc pertinent omnes disputationes Rhetorum pro tormentis & contra tormenta. Si enim causam juvant, tunc tormenta extollenda docent, ὅτι ἀληθεῖς μόναι τῶν μαρτυριῶν αὐτάς. quia veræ solæ ex testimoniis sint. Si non? evertenda quod ἀναγκαζόμενοι, qui cōgantur, tam falsa dicant quam vera, & ῥαδίως καταψευδόμενοι, ὡς παυσόμενοι θάπτον, mentientes facile; ut requiescant citius. Arist. lib. 1. Rhetoricorum c. 15. eadem habet Rhetor. ad Alexand. c. 17. ubi tandem concludit, τὰς μὲν δὲ βασάνους ἐκ τῶν ταύτων πιθανὰς καὶ ἀπιθανὰς καταστήσομεν. Quæstiones (sive tormenta) ex iis probabiles & improbabiles constituemus. At quod probabile tantum est; illud non est certum, multo minus excludit formidinem oppositi. In hoc enim differt probabile

bile a certo, quod hoc excludat formidinem oppositi. Similia habent latini Rhetores. Autor l. 2. ad Herenn. c. 1. cum pro tormentis etiam loquitur, illa confirmari vult *iisdem viis, quibus omnis conjectura tractatur, sc. ut trahatur ad verisimilem suspicionem.* Ciceroni E. confessio in tormentis edita ultra conjecturæ & verisimilis suspicionis modum non ascendit: quæ sufficientem causam non præberet iudici tantis cruciatibus ipsa morte acerbioribus hominem subijciendi. In partitionibus c. 9. *non esse obscurum, in utraque parte esse exempla & ad Conjecturam faciendam locos.* lib. 2. Rhet. c. 2. *Nunc exponemus in conjecturalem constitutionem, qui loci communes incidere soleant, & c. quæstionibus credi oportere & non oportere.* Quintilianus. 5. Instit. c. 4. plenas esse ait de hac re orationes Veterum ac novorum, & infinitatem circumstantiarum varietatem. Huc referri posset, quod Quæstio ad statum Orationis *conjecturalem* referatur. At hoc argumentum apud Artis peritos forsitan non magnopere pugnaret.

Dices. Quæstioni non aliter fides habenda est, quam si finita quæstione post aliquod temporis intervallum repetita confessio apud acta fuerit. Resp. habet & hoc Plautus in Truculent. Act. IV. scen. 3.

Rogavi ego vos verberantes & pendentes simul:

Commemini, quo quicque pacto sitis confessæ: scio.

Hinc nunc volo scire eodem pacto, si sine malo fateamini.

i. e. sine verberibus & dolore. At difficultatem non tollis. Sciunt enim, nisi ad placitum loquantur Quæstitoris, se revocatum iri ad tormenta, ubi spontanea non censerî potest ejusmodi confessio, quæ ex metu periculi fit. Nec refert quicquam aliquis compulsus fecerit, vel metuens, ne compelleretur: Idemque de timore mali, cum præsens adest, quod de malo ipso judicari solet. Id quod non obscure ap. Plautum significat in Perfa Virgo, cum ait. act. M. sc. 1.

Cogi-

*Cogita hoc Verbum, Pater, Herus si minatus est
Malum servo, tametsi id futurum non est, ubi captum est
flagrum*

*Dum tunicas ponit, quanta afficitur miseria, ego nunc,
quod*

Non futurum est, formido tamen.

Qua ratione etiam timor armorum idem operatur, quod vis ipsa armis illata. Cicero explicat. pro A. Cæcin. Tu vim negabis esse factam, si cædes & occisi facta non erit? Ego exercitus maximos sæpe pulsos & fugatos esse dico terrore ipso, impetuque hostium sine cujusquam non modo morte, verum etiam vulnere. Etenim non ea sola vis est, quæ ad corpus nostrum vitamque pervenit, sed etiam multo major ea, quæ periculo mortis injecto, formidine animum perterritum loco sæpe & certo de statu dimovet. & post. dubium non est, quin major adhibita vis ei sit, cujus animus sit perterritus, quam illis cujus corpus vulneratum sit. Exemplo esse potest ipse Philotas apud Curtium l. c. quem, licet in eculeo confessum, non ante damnari Alexander sustinuit, quam denuo ex intervallo rogatum, quæque fassus in tormentis fuerat agnoscen- tem. Agnovit quidem Philotas sed metu, ne rursus excrucietur. l. 6. c. 2. n. 36. Accedit & illud, quod plerumque judex vel Quæstor interminetur, quæstionem sed denuo de eo, ni fateatur, habiturum. Quo in casu omnino probabiliter existimandum est, recte timuisse, cui per Judicis poenale præceptum interminatum est, præcipue cum minacem adhibuit vultum Quæstor, ut apud Senec. l. 3. controvers. 14. instat tam denunciationibus quam tormentis tyrannus & minando torquet, tacet: videt intentum tyranni vultum videt oculos minaces. Quis enim non metu extortam confessionem interpretabitur, si ab aspero sævoque quæsitore, qui quod pollicebatur, præstare minasque statim exequi poterat, interminatum compererit; maxime si is, qui tortus est, sit vel foemina vel effoeminatus & meticulosus, qui omnia etiam elusoria exhorrescunt. Talem autem confes-

sionem etiam apud acta deinde factam spontaneam esse & sufficientem inducere probationem, nemo mihi persuadebit. Scit enim, nisi ad placitum respondeat quaesitoris, se iterum raptum iri ad eculeum. Ita & Callicles apud Plautum l. c.

- - - edico prius.

Nec duplices habeatis linguas,

Nisi ad tintinnaculos vultis vos educi viros.

Quis has ancillas non perterrefactas diceret his feralibus minis, quæ jam tormenta expertæ erant. Extra dubium esse puto, si qui in conspectum tormentorum deducantur, animos non mulierum tantum sed & virorum lugubri isto apparatu frangi. Sic Xychus ille apud Livium l. 40. *qui conspectum tormentorum verborumque non sustinuit: ordinemque omnem facinoris legatorum ministeriique suis exposuit.* Et Natalis apud Tacit. A. XV. 56. 7. *qui tormentorum conspectum & minas non tulit, quem pari imbecillitate secutus est Scevinus ib. n. 3.* Ita apud Livium l. 26. Numidarum transfuga aliquis cum literis ad Hannibalem captus cum tormenta posci & parari videret, *fassus est.* Et l. 27. equites 4. Gallos & duo Numidas ab Alstrubale ad Hannibalem missos cum literis, *mutus tormentorum admotus fateri vera coëgit.*

§. VIII.

AB HORRORE NATURÆ. Nam vivunt tam multæ gentes & barbaræ, quæ ferum & inhumanum arbitrantur torqueri hominem, de cuius facinore dubitatur. & post. profecto carnifices animos habemus, qui sustinere possumus gemitus & lacrymas tanto cum dolore expressas, hominis, quem nescimus sitne nocens. Lud. Viv. ad l. 19. August. c. 6. *Si mori oporteat, quod genus feritatis est ipsum prius excarnificare &c.* Populus tam horrendam feritatem videre non assuefactus ex hac miseria dolorem hauriret: Principem quoque & iudices abominaretur, qui tale genus crudelitatis inveherent. Schmith. de Repub.

Repub. Angl. l. 2. c. 24. ⁵ Etiam fontibus & reis suo modo debetur commiseratio; nedum illis, quos fontes esse nondum exploratum habemus. Bias damnaturus aliquem ad mortem, lacrymatus est, τῇ φύσει τὸ συμπάσις *naturæ affectum*, legi suffragium reddidit Stob. 44. Siden. Apoll. l. 1. Ep. 7. laudat Imperat. quibus amare palam liceat & capite damnatos. Lactant. l. 6. Inst. maximum scelus putat odisse hominem vel nocentem. Tacit. A. VI. 19. inter alias Tiberii crudelitates & hæc recenset. quod amicis damnatis & occisis adfistere, adlacrymare; ne visere quidem datum, & post Intercederat sortis humanæ commercium vi metus: quantumque sevitia glisceret, miseratio arcebatur. Si autem miseratio etiam damnatis debetur; multo magis illis, de quorum scelere adhuc dubitatur.

§. IX.

A VETERVM INIQUI TATE. Nam & servi in causa Dominorum rapiebantur ad tormenta, qui tamen nihil commiserant. Quamvis Cicero pro Dejotaro significet hoc interdum de more majorum fuisse vetitum: attamen apud Tacitum. A. II. 30. 4. & 5. in causa Libonis servos per tormenta interrogari placuit. Et quia vetere Scto quæstio in Caput Domini prohibebatur, callidus & novi juris repertor Tiberius mancipari singulos actori publico jubet: sc. ut in Libonem ex servis salvo Scto quæreretur Arcadius sancivit, si ea rei conditio sit, Arenarium testem vel similes personas admittere cogimur, sine tormentis, testimonio eorum credendum non esse: sicut nec servis olim sine quæstione credebatur.

Dices. Personis vilissimis ut arenariis, servis, &c. sine tormentis non creditur, quod contumaciter & obstinata sua malitia reticere veritatem intelligentur. Resp. 1. in tenui fortuna major sæpe hominum integritas, ut qui nullam jacturam bonorum exhorrescunt, quam in aliis, quos varia pericula fortunarum, honoris, famæ &c. turbare possunt.

2. Ad

2. Ad minimum sunt homines, qui secundum contrariæ opinionis assertores, æque natura nati sunt liberi & æquales. Etiam *in mancipio cogitandum*, inquit Seneca. l. i. de Clementia. c. 18. *non quantum illud impune pati possit, sed quantum tibi permittat æqui bonique natura*. Sicut autem per servitutem aut vilitatem non desinit esse homo ad imaginem Dei creatus: ita etiam longe præstantior est, quam ut propter civilia delicta torquendus sit. Id. Ep. 31. in fin. *animus rectum, bonum, magnum, quid aliud voces, quam Deum in humano corpore hospitantem? Hic animus tam in equitem Romanum quam in libertinum, quam in servum potest cadere. Quid est Eques Romanus, aut libertinus, aut servus? Nomina ex ambitione aut injuria nata*. Fluit hæc opinio ex veterum duris de servorum conditione placitis, *servum totum esse Domini, nec juris aut injuriæ capacem, habendum pro mortuo & nullo, Dominum habere jus vitæ & necis, &c.* quæ Christiana Religio dudum mitigavit. Juvenalis sat. VI. dum loquitur de Dominis præcipitanter nimis servos ad crucem rapientibus. *Nulla unquam de morte hominis (etiam vilissimi) cunctatio longa est*, exclamat: ita & nos, quando ob pecuniariam causam vel in casu testimonii deponendi ita abripiuntur. *Vistu cogitare istum, quem servum tuum vocas, ex iisdem seminibus ortum, eodem frui cælo, æque spirare, æque vivere, æque mori. Tum tu illum ingenuum videre potes, quam ille te servum*. Senec. Ep. 47. Auget rem, quod in causis olim pecuniariis tantum, servi tamen ad torturam rapti fuerint. Nam Divus Pius rescripsit, *posse de servis haberi quæstionem in pecuniaria causa, si aliter veritas inveniri non possit*. Et Diocletianus, *interrogari servos de facto suo, non solum in criminali causa, sed etiam in pecuniaria posse non ambigitur*. At nulla est proportio inter tam acerbissimos cruciatus corporis, & pecuniam. Etiam si concederemus in delictis atrocibus, quæ pœnam capitalem post se trahant, non plane absurdam esse quæstionem: in causis tamen pecuniariis, & ubi tantum pecuniæ periculum est, nullam proportionem inve-

inveniri possumus. Absurdum enim est, ejusmodi probationes criminis petere, quæ ipsa pœna crimini debita sunt acerbiores. Si in causis liberalibus, cum de statu quæritur, cessant tormenta, cur non etiam in pecuniariis. Longe autem illa gravior est, ideoque etiam iudicibus pedaneis adempta. Atque ex his fundamentis miramur, cur Pontifex Alexander III. c. 1. X. Depositi Clericum depositarium propter rei depositæ furtum torturæ subjiciat, cum alias furtum tantum sit delictum privatum; nec capitis pœnam de jure antiquo post se traxerit.

§. X.

EX COMPARATIONE CVM CENSURA ECCLESIASTICA, quæ sine tortura peccata corripit. Habet illa suas pœnas, interdictum & excommunicationem sive majorem sive minorem; atque sic sine violentis mediis tendit ad suum finem, quæ indagare nequit, Domino commendat usque ad messem & plenam eradicationem zizaniorum. August. l. 3. contr. Epist. Parmeniani c. 2. *Misericorditer corripiat homo, quod potest. Quod autem non potest, patienter ferat, & cum dilectione gemat ac lugeat, donec aut Deus desuper emendet & corrigat, aut usque ad messem differat eradicare zizania & plenam ventilationem.* Cur igitur Respub. non posset tendere ad finem sine tormentis.

§. XI.

A MVLTIS DIFFICVLTATIBVS, „quibus se contrariæ sententiæ Patroni intricant. 1. An tortura sit meri „vel mixti imperii? quod sit crimen grave aut leve? An „incestus jure civili fustigationis tantum pœna coërcendus? „An in criminibus extraordinariis, quæ definitam pœnam „non habent, sed quam judex extra ordinem pro arbitrio „imponit, tortura locum habeat? An furtum, an scœnus „improbum torturam admittat? An ex maleficio civiliter „agatur in causa pecuniaria, si sit magna pecuniæ summa, „si annexum habeat delictum, ut Mercatores falliti? An

E

feudi

„feudi Dominus, si Vasallus grave crimen commisit, ob
 „quod feudum amittitur, postulare queat, ut Vasallus tor-
 „mentis subjiciatur? An accusatori probationibus se desti-
 „tutum asserenti juramentum deferendum? At si judex sine
 „indiciis aliquem ad torturam rapiat, ille etiam crimen
 „fateatur, ac post torturam demum superveniant indicia
 „legitima, Reus ex confessione sua damnari possit? Quo-
 „modo differat indicium, conjectura, præsuntio, suspi-
 „cio. An unius testimonium de crimine admissio præbeat
 „indicium ad torturam? An confessio propria, fama, fu-
 „ga, loci accessio, inimicitia capitalis, vultus mutatio, si-
 „lentium, assertio de sociis, de mandatore delicti, de pa-
 „cisciente; sic frequentatio loci, vicinus malæ conditionis,
 „postulatio rei ultronea, ut in se inquisitio fiat, denun-
 „ciatio ejus, qui se vidisse flagitium ait, conversatio cum
 „malis, receptatio, associatio, secreta allocutio, Physi-
 „ognomia &c. sint indicia sufficientia ad torturam? Præ-
 „terea nunc indicia specialia furti, rapinæ, adulterii, ve-
 „nificii, infanticidii, &c. quæ & dubia & intricata, & in-
 „finita fere, vix omnia comprehendere possunt. An per
 „unum testem fide dignum probetur indicium? plures te-
 „stes singulares quando faciant indicium? an admittendi
 „ad testimonium minores, mulieres, infames, inimici, in-
 „habiles? an detur appellatio in his rebus? Quæ sint illæ
 „personæ, quæ tormentis interrogari non possunt? Quan-
 „tum adhuc Chaos restat de generibus torturæ, de modo
 „torquendi, sic an tortura repeti possit? quando rei con-
 „fessio tormentis expressa sit rata? quid agendum, si re-
 „vocetur? quid cum iudice faciendum, si reum illegitime
 „torserit? &c.,, Vix sane judex e tantis tricis se extricabit,
 aut in suæ conscientiæ scrutinio securus erit, se modum
 non excessisse. Est sane res ardua & gravissima, ubi de
 capite hominis agitur: non hic ludendum aut dubitanter
 aut trepidanter agendum: sed omnes consultationes certo
 fundamento niti debent; quale vix ullum sperari potest in
 tanta dissensione Dd. & opinionum.

§. XII.

A PAUCITATE PERSONARVM, quæ torturæ subijci possunt. Excusantur enim a tormentis impuberes, furiosi, mutus & surdus, senex, gravi affectus valetudine, foemina prægnans, puerpera, omnes, quibus nomen Clarissimi competit, ut personæ Illustres, Nobiles, Senatores, Equites, Doctores; sic & clerici, milites, Decuriones, &c. Manet ergo tortura Plebejorum propria. Si autem Respub. potest consistere sine tortura eorum, qui potentia, autoritate, scientia armati plus nocumenti dare & magis delicta sua celare possunt, cur ergo viles tantum animæ & plebejæ torturæ subijciunt, a quibus scelera nec tanta, nec in tanto secreto metuenda?

§. XIII.

Claudimus nostras rationes testimonio B. Lutheri, qui tom. 7. Jenensi, fol. 359. & seqq. quamvis non ex toto damnet, neganti tamen propior videtur in scripto contra Episcopum Magdeburgensem. Weil die Marter im Kerker eine gefährliche Rechtfertigung ist, und ohne Noth nicht zu gebrauchen ist, dann oft Unrecht da begangen wird: Und der Cardinal eine feine Brücke, ja eine öffentliche freye Strasse für sich hatte zum Recht, ic. so hätte er sollen Gottes Gebot nach dieselbe freye Strasse gehen, und Gott nicht versuchen mit der gefährlichen Rechtfertigung, dann alle Menschen, es seyn Richter oder Part, seyn schuldig, daß sie Gott nicht versuchen. Darum ob der Cardinal für der Welt solche Rechtfertigung schmücket, so ist er doch damit vor Gott verdammt, als der sie mit Gottes Versuchung gewonnen, ic. & post. p. 360. Wie oft ist es auch mehr geschehen, daß etwan Leuthe seyn hingericht auf ihr Bekänntnis, da man hernach über etliche Jahr erst bekommen hat die recht schuldigen; Und ist jenem gleichwohl Unrecht geschehen. Das rede ich darum, wie oben gesagt, wo man das lichte tägliche Recht haben kan, soll man solch finster Nothrecht meiden, oder heißt Gott versucht, das ist verboten bey Gottes Zorn und Ungenaden, ic.

Adjungimus Ludovicum Vivem in Augustinum l. 19. de C. D. c. 6. Zepperum de LL. Mosaicis. l. 5. c. 10. Grevium, quem tamen videre non contigit in *Tribunali reformato*, qui expresse nostram defendunt sententiam.

CONTRARIAM SENTENTIAM si expendamus, multa occurrunt notatu digna. Sequamur vestigia Wesenbecii Paratit. l. 48. ff. tit. 18. Ita ille numero. 1. Quia vero crimina plerumque clam arbitris & occulte committuntur, ut sæpe copia testium haberi non possit, ideoque more majorum introductum esse, inquit Cicero part. Orat. ut per tormenta veritas exquiratur &c. Ex quo discursu aliquot formari possent objectiones.

Obj. 1. Praxin introductam aliud velle. Resp. Quid Praxin memoras? Sic etiam *Parrhasius*, pictor *Atheniensis* excusatur, qui cum *Philippus* captivos *Olynthios* venderet, emit unum ex his senem, perduxit *Athenas*, torfit usque ad mortem & ad exemplar deficientis pinxit *Promethea*, deinde tabulam in templo *Minervæ* posuit. Ita enim excusatur apud *Senec.* l. 10. controvers. 5. multum semper licuisse artibus. Medicos ut vim ignoratam morbi cognoscerent, viscera rescidisse: hodie cadaverum artus. Sed sit Praxis. Quoties theoria recedit a Praxi? quoties etiam apud illos ipsos *Labeo* aliquis fiducia ingenii quædam innovat a communi consensu Doctorum recedentia? *Philosophia* libere res tractat, nec curat quis dixerit, sed quam vere dicatur: *Amicum* judicat *Socratem*, *Platonem*, *Ulpianum*, *Paulum*, *Modestinum* &c. sed magis veritatem.

Dices. At etiam *Honorius* & *Arcadius*, *Valens*, *Valentinianus*, *Justinianus*, & *Impp. Christiani* hæc retinuerunt. Respondet *Lud. Vives* ad L. 19. C. D. c. 6. *Miror, Christianos homines tam multa Gentilia, & ea non modo charitati & mansuetudini Christianæ contraria, sed omni etiam humanitati, mordicus tanquam religiosissima retinere.*

At, inquit *Wesenbecius*, pleraque crimina clam arbitris, & occulte committuntur, ut semper copia testium haberi nequeat:

queat: ita multa scelera manerent impunita. Resp. Quod mandatum divinum, quæ necessitas Reip. exigit, ut omnia scelera occulta a iudice temporali eruantur & puniantur? Excusatur iudex, si debitam adhibuit diligentiam: quæ vestigare nequit, supremo iudici relinquat: ut ad dira ista tormenta decurrat opus non est. Imo ausim dicere, Deum certo respectu non velle, ut omnia occulta a iudice temporali eruantur & puniantur, quia statuit Diem, in quo iudicaturus est Orbem terrarum. Act. 17, 13. Hic, hic erit illud tribunal, coram quo occulta producentur & examinabuntur. Nihil erit opertum, quod non revelatur Matth. 10, 26. Conf. Marc. 4, 22. Luc. 8, 17. c. 12, 2. Hinc dicitur Dies ἀποκαλύψεως, Revelationis, quia tunc revelabit Deus occulta cordium. 1. Cor. 4, 5. ac libri aperientur, in quibus omnia cogitata, dicta, facta etiam occultissima scripta sunt. Apoc. 20, 12. Hic est ille Dies, qua iudicabit Deus occulta hominum. Rom. 2, 16. cum Dominus venerit, iste illuminabit abscondita tenebrarum. 1. Cor. 4, 4. Cur iudex secularis occuparet alienum negotium, & tam diris modis inquireret occulta, quæ Deus sibi reservavit? Eleganter Chrysostom. hom. 46. ad Popul. Antioch. Nec ab omnibus, inquit, hic exigit Deus, ne resurrectionem desperes, & iudicium desinas expectare, quasi omnes hic reddant rationem. Nec rursus omnes abire permittit impunitos, ne rursus omnia providentia carere putes. Verum & punit & non punit. Et in quantum punit ostendit, quod hic punitos, & illic rationem exposcet. In quantum autem non punit, facit, ut credas, quod est aliquando post præsentem peregrinationem tremendum tribunal. Ut ergo Magistratus in consultando consilia, quibus impar est fato. i. e. Deo permittit. Tacit. A. VI. 46. 4. ita & in vindicando, postquam debitam adhibuit diligentiam, iniquos Deo in diem iudicii reservat cruciandos. 2. Pet. 2, 9. Non absurde Alexander Papa q. 6. 15. c. 1. Si omnia in hoc seculo vindicata essent, locum divina iudicia non haberent. Insuper ex criminibus clam arbitris commissis citius, Iudex remota

tantum indicia ad torturam non sufficientia & suspiciones hauriet, quam semiplenas probationes.

Dices cum Patris de Puteo tract. de syndicat. & torturam v. de repetition. n. 6. Sine timore torture non posset mundus in pace stare. & cum aliis, aperiretur occasio delinquendi, quia vix per aliam inquisitionem delicta protrahi in lucem & veritas cognosci posset. Resp. 1. per instantiam. Respubl. Davidica & Salomæa in pace stetit sine tortura: sic & alia Regna, quorum supra mentionem fecimus. 2. Melius est, ut dimittantur centum nocentes quam condemnetur unus innocens; interim rarissime contingit, ut iudex nulla inquisitione penetrare queat. 3. Dantur adhuc alii inquirendi modi. Laudat Augustinus Ep. 159. & seqq. Marcellum Tribunum, quod horrenda facinora Donatistarum eruerit, non extendente equuleo, non sulcantibus ungulis, non arentibus flammis, sed verberibus virgarum. Contrariæ sententiæ Patroni negant alias de se confessum, ne aliena salus in dubium vocetur, in caput aliorum quærendum. At si hæc ratio apodictice concluderet; cur non liceret etiam ex sponte confessis alios quoque fontes eruere, & fontes exterminare?

Provocat Wessenbecius ex Cicerone ad Atheniensium & Rhodiorum Rempubl. At has bene constitutas fuisse Respublicas unde probabit? Exempla imitanda non ex deterri- ma Democratia, ad quam Atheniensium prolapsam fuisse Philosophus 2. pol. 10. diffitetur, desumenda sunt, sed ex bene formatis Rebuspublicis, qualis fuit Davidica & Salomæa.

Pergit Wessenbecius n. 3. Causa efficiens questionem est mos antiquissimus omnium fere bene institutorum Populorum communis, ut non immerito pro jure gentium habeatur. Partius ista viris. Apud Ethnicos semper occurrunt Ethnicæ tenebræ. Non omnis mos antiquissimus statim probatus est, & jus gentium facit; quin longa consuetudo sine veritate vetustas erroris est. c. consuetudo. dist. 8.

Dices

Dices cum eodem n. 6. & 7. non statim hominem ad equuleum rapiendum, sed 1. tum, cum veritas aliter haberi non potest. 2. cum reus multis indiciis oneratus & pene convictus est, ita ut indicia illa faciant semiplenam probationem. Resp. 1. Si veritas aliter haberi non potest, satius est impunitum relinqui facinus nocentis, quam nondum convictum ipsa ordinaria poena acerbioribus cruciatibus subicere, aut pro incerto scelere, ut loquitur Augustinus l. c. certissimas poenas exigere. Quæ enim necessitas juris divini aut naturalis cogit judicem, ut tam diris & duris mediis verum inquirat. Satis functus est suo officio iudex, si omnibus aliis mediis tentatis verum elicere non potuit, reliqua divino iudicio commendet. Melius enim est, ut dimittantur centum nocentes, quam damnetur unus innocens. Quin quod rarissime contingat, talis aliquis actus atrocissimus, quem nulla inquisitione penetrare queat iudex. Quis autem culpabit, si in ejusmodi rarioribus contingentibus rem Deo committat. At Pontificia Glossa per canonem illum. 59. *Questionem q. 12. t. 2. qui & habetur l. 1. C. de Questionibus*, intelligit quæstionem in crimine Majestatis, adulterii, fraudati census & homicidii nullis præcedentibus indiciis. Format sibi objectionem. *Dicunt quidam, quod nec in exceptis criminibus servus contra Dominum admittitur, nisi aliqua præsumptio præcedat.* Respondet deinde. *Set litera hoc non patitur. Dico ergo hoc speciale, ut initium sumatur a tormentis.* 2. Insuper intricata adhuc res est inter indicia remota & propinqua, dubitata, indubitata, juris & facti, levia, gravia, gravissima. Quis hic nobis suggeret filum Ariadnæum, quo nos ex hoc labyrintho extricemus. Quid si indicia concurrant inter se pugnancia? E. g. si testes dicant. Vidimus Sempronium noctu occidi; & tamen fuerit nox illunis.

3. Distinguendum etiam est inter indicia, quæ corporis cruciatum non important, aut causam criminalem; sed tantum ad alia Civilia respiciunt. In his facilius judicem

cem indicia sequi & tutius posse concedimus, quia fieri potest restitutio, quando indicia fallunt. Ita Salomon *1. Reg. 3. v. 26.* ex *σοφῶν* naturali indicium sumit, quæ sit vera mater infantis. An vero tale sufficiens fuisset ad hominem torquendum, adhuc dubitari potest. Ita indicium est apud illos etiam, *Ordinat. Crimin. Art. 29.* si homo cum gladio cruento prodeat e loco, aut conspiciatur in loco, ubi homo trucidatus est. At & hoc fallere potest. Autor. *l. 1. ad Heren. c. 5. n. 30.* ponit casum. *Ajax in sylva, postquam rescivit, quæ fecisset per insaniam, gladio incubuit. Vlysses intervenit: occisum conspiciatur: e corpore telum cruentum educit. Teucer intervenit, cum fratrem occisum, & inimicum fratris cum gladio cruento videt, capitis accersit.* Incidit h. *l.* illud indicium, cum cadaver hominis interfecti in præsentia ejus, qui de homicidio illo suspectus est, sanguinem effundit. Multum a multis huic indicio deferri scio. At quomodo illud, quod supra naturam est, & cujus causa nobis occulta, nobis naturaliter probabit; imo quod pugnat cum natura, sc. *cadaver exangue habere sanguinem, & corpus frigidum egerere sanguinem.* Judicis est arbitrari, sitne indicium sufficiens; at quomodo ratiocinabitur, si tota res intellectum judicis superat. Tortura sane res est præjudicii gravissimi, ad quam Judex procedere non debet, nisi ex causis humano intellectui convenientibus. 4. At nos Philosophice progrediemur in hac re. Quintilianus *l. 5. Instit. c. 9.* distinguit Signa (*ΙCtis indicia*) in *τεκμήρια* sive necessaria, & *σημεία* sive non necessaria, e. g. ille, sine cicatrice est. E. ferro non est vulneratus: hic, vestem cruentam habet, E. homicidium fecit: At hoc nil operatur; potuit enim sanguis vel ex naribus profluxisse. Aristoteles *Rhet. ad Alexandr. c. 13.* distinguit inter Signa quæ opinionem faciunt, & quæ scientiam. Areopagitæ olim damnabant puerum coturnicum oculos eruentem propter signum perniciosissimæ mentis, multisque malo futuræ, si adolevisset. Spurio Melio & M. Manlio popularitas signum affectati regni fuit. Ergone suffi-

sufficiens? *Nulla res est*, inquit Cicero. c. 1. l. 2. ad Herennium de signis, *quam non suspicionibus quivis possit criminari*. Idem Cicero in Partit. Orat. c. 16. inter signa *proprie attinentia* eos ipsos, qui arguuntur, refert *telum, vestigium, cruorem, deprehensum aliquid, quod ablatum creptumque; responsum inconstans, hesitatem, titubatum, &c.* At Quintilianus casus ejusmodi ponit in suis Declamationibus, quibus etiam pars innocens onerari potuisset. Illud exemplum facile concesserim, quod Cicero l. 2. de inventione habet. *Si peperit. E. cum viro concubuit.* At tales indubitata nota occurrunt rarissime.

Dices cum Quintiliano l. 5. c. 12. *Hæc imbecillia natura mutuo auxilio sustentur. Itaque si non possunt valere, quia magna non sunt, valebunt, quia multa sunt &c. Singula levia sunt: universa vero nocent, etiamsi non ut fulmine, tamen ut grandine.* Resp. At & hæc refelluntur contrariis artibus. *Dicemus hoc modo*, inquit Cicero ad Herenn. l. 2. *nullam rem esse, quam non suspicionibus quivis possit criminari; deinde unamquamque suspicionem extenuabimus, &c.* Nolui-
mus huc trahere colores in Senecæ controversiis passim.

Videmus illic plures colores, non tamen perfectam probationem facere. Eodem modo plures verisimiles conjecturae non tamen perfectum aut indubitatum faciunt indicium. Neque enim si plura imperfecta, ut oculum, manum, pedes jungas, statim hominem facies. Dices. Sufficiunt ad quaestionem, non ad condemnationem. Resp. At Quaestio morte durior est, ut supra ostensum. Imo quod in se semiplenum, id neque aliis conjunctum fiet plenum, neque enim si plures claudicantes jungas, statim incessum rectum & plenum efficies. In causis civilibus aliquid concesserim: at in criminalibus, ubi de vita hominis disceptatur, res certa esse debet.

5. Magna adhuc & intricata quaestio est: *Quæ sint illa indicia, quæ faciunt semiplenam probationem?* Duo testes faciunt plenam probationem, non tamen sequitur, E. VNVS

TESTIS facit semiplenam probationem. Non. Nam & duo faciunt numerum, non tamen statim unitas facit feminumerum. *Vnius autem testis non sufficit assertio, etiamsi præjudiciali refulgeat dignitate*, ait Pontifex Innocent. III. c. licet. X. de Testibus. Quod Ordinatio Criminalis Carol. V. art. 30. habet, scimus, sed nos Philosophice. i. e. theoretice non practice disputamus. Sic etiam CONFESSIO PROPRIA EXTRAJUDICIALIS. Nam & hic est testis unus, qui nunquam serio in caput suum periculum inducet; & quod privatim dixit, facile contraria confessione perimere potest & revocare Non FAMA. Nam hæc tam ficti pravi-que tenax, quam nuncia veri; hæc veris addere falsa gaudet, & e minimo sua per mendacia crescit. Quis enim ab istis in secreto stridentibus viperis immunis est, quæ venenatis suis censuris & susurris sæpe optimos viros subvertunt? *Fama malum? an quia plurimum mendax? quæ ne tunc quidem, cum aliquid veri assert, sine mendacii vitio est, detrahens, abiciens, demutans de veritate?* Tertull. Apol. c. 6. Est & hoc contra Sac. literas *Exod. 23. 1. non sequeris vocem mendacii*, i. e. sinistram de aliquo famam. Levium. E. hominum, non sapientum est vanum aucupari rumorem. Non FUGA. quia etiam innocens & minime reus fugere potest, ne de facto apprehendatur, & in carcerem indigne conjiciatur. Sic nec discipulo aut servo vitio vertitur, si ad tempus se subtrahat, ut iracundiam Domini aut Magistri evitet. Alcibiades citatus ab Atheniensibus ad causam capitis dicendam noluit venire, & Aristoteles quoque noluit committere, ut Athenienses bis peccent in Philosophiam. Reliqua indicia, ut *inimicitie capitales*, sunt remota indicia; sic & *minæ*, cum raro homines minas, quas in calore præcipitant, exequantur: *inconstantia* & variatio sermonis vel etiam *trepidatio rei*, quæ non tam ex mala conscientia, quam ex metu impendentis torturæ oriri potest: sicut illa ex lapsu memoriæ turbatæ per imminencia pericula. Sunt etiam quidam natura timidi, quando in
publi-

publico ipsis loquendum est, quod vel exemplo ipsius Ciceronis & Demosthenis summorum Oratorum probari posset. Cætera indicia transimus ceu remotiora: ut *frequentationem loci*, ubi aliquid patratum, *insolitum accessum*; quæ alio fine fieri possunt, quam ut maleficium patretur, ubi unusquisque magis bonum, quam malum præsumere debet in iis quæ in mitiorem partem interpretari possumus; *vicinum malæ famæ, conversationem cum improbis*. Nam & Noah, Loth. ipseque Salvator cum improbis vixit. *Receptionem*, quæ ex ignorantia vel consanguinitate aliquando accidere potest, *auxilium ad fugam vel asylum* quod vel misratio vel amicitia suadet, non *impedientem*, quia aliquando cum propriæ salutis periculo conjuncta est ista obviatio maleficii. *Natione infamatum*. Nam alias omnes Cretenses delinquentes rapiendi essent ad torturam, quia Paulus *Tit. 1, 12.* dixit, Cretenses semper mendaces, malas bestias, ventres pigros, & hoc testimonium verum esse. *Non eum, apud quem res furtiva inventa est.* Nam & sic Benjamin *Gen. 44, 12.* apud quem Scyphus Josephi inventus fuit, torqueri potuisset. Sufficiant hæc, quis enim omnia omnium maleficiorum indicia comprehendet? 6. Insuper non leve dubium superest. An judici sufficiant ista indicia, quæ ex rumore tantum vulgi ad aures ipsius pervenerunt: an vere etiam ista *indicia* prius judici probanda sint? Si hoc, quot testibus? Unus testis *jure divino* rejicitur, sine exceptione: an sit ocularis vel auritus. Plures testes sufficientes raro in ejusmodi criminibus occultis adsunt. Testes singulares, pueri, minores, infames, mulieres, inimici, domestici vix fidem facient. Per tot ergo ambages Judici eundum est, usque dum ad *indicia* perveniat: deinde demum ad Quæstionem ipsam rem valde ancipitem & periculosam, i. e. per dubium ad dubium. *Innocentius III. c. cum oporteat. 19. X. de accusationibus*, inimicos aliosque inhabiles ne quidem ad inquirendum admittit. Augustin. l. qq. V. T. quæst. 45. *mulier nullam auctoritatem habet: nec docere enim potest, nec testis esse, neque fidem dare, &c.*

Quis enim in causa criminali admitteret mulierem, quæ nequidem in testamento testis est idonea. 7. Quid quod indicia ab aliquibus adferantur ridicula, ut turpe aut *malum nomen* esse indicium ad torturam; quod adeo placet *Ludovic. Cares in pract. Criminal. tract. de indiciis & tortur. indic. 29.* ut allegat exemplum Abigaelis de Marito sua Nabal. loquentis *1. Sam. 25, 25. quoniam secundum nomen suum stultus est.* Ad quamvis convenient rebus nomina sæpe suis, id fit per accidens, quod & *Quintil. l. 5. c. 10.* ostendit, *nomen in argumentum raro cadere, nisi cum aut ex causa datum sit, aut & ipsum alicujus cogitationis attulit causam.* Nec tantum nomen esse indicium sunt, qui censet, sed & illum primum e complicitibus torturæ subjiciendum esse, ut magis suspectum *Hippolyt. de Marfil. in pract. Criminal. §. expedita n. 25. & ad l. 1. §. 1. n. 71. ff. de Quæstion. Francisc. Cason. tract. de torment. c. 13. n. ult.*

Dices tandem n. 12. *Finis torturæ est ut veritas tantum exprimatur, non ut quis puniatur.* Resp. Solus finis non facit rem justam, si ipsa media quavis fere pœna capitali acerbiora sunt. Lusus est in vocabulis, aliquem non punire, & tamen doloribus aut cruciatibus fere enecare. *Crudeles illos vocabo, qui puniendi causam habent, modum non habent. Sicut in Phalari, quem ajunt, non quidem in homines innocentes, sed super humanum aut probabilem modum sævisse.* *Senec. l. 2. de Clem. 4.* At dolores morte ipsa & pœna capitali non minores inferre, quid aliud est, quam punire. Alii adducunt *Isidorum Pelusiotam l. 1. Ep. 116. Cum sapiens veritatis inventum habeas, multiplicem tormentorum machinam, timore ad judicium utere: quandoquidem divina lex improbis te constituit terrorem.* Resp. *Isidorus Monachus* de eo loquitur, quod fiebat suo tempore, non quod fieri debuisset; Ivit ergo, non quæ eundum erat, sed qua ibatur. Quid si diceremus, *Isidorum errasse?* vixit jam *Theodosii junioris* tempore & practice locutus est, non theoretice. Vigebat tum temporis quæstio & tantum in diebus *Quadragesimæ*, ut ex *Codice Theodosia-*

dofiano l. 9. tit. 25. patet, suspendebatur. Prolixus titulus extat tom. 7. Oper. Basilici, qui est tit. 50. lib. 60. quemadmodum quaestio apud Græcos fuerit exercita. Quid igitur mirum, si erret communem errorem. Keckermannus l. c. disp. 32. q. 4. aliter excipit. *Si nullo plane, inquit, dolore veritas extorquenda esset & c. necessario sequeretur, aut sceleratos ad supplicium esse trabendos, etiamsi nulla eorum propria confessio accedat, aut ex centum flagitiosis vix unum esse puniendum. sc. propter defectum in talibus criminibus testium. Resp. Quæ necessitas juris naturalis requirit confessionum. Apud Anglos quaeritur Reus, quomodo decerni rem velit, monetque, respondendum esse, Dei populi que judicio; id postquam responderit, nempe Dei populi que judicio decerni volo. Schmith. l. 2. Reip. Angl. c. 26. tum sive fateatur, sive diffiteatur, absque mora, si Duodecim virorum calculo condemnatur, diem ultimum obire necesse est. id. l. c. 17. Confessionem quidem Jonæ & Acham legimus; at illa fuit spontanea, non per torturam extorta, in casibus divinitus manifestatis, ubi nulla prius aderant indicia. Si delinquens Reus evidentibus probationibus convictus tamen persistat in negatione sua; condemnari potest, omissa tortura. Preinliche Halsgerichts-Ordn. Art. 69. Si definit evidentes probationes, in tantum puniendus, in quantum inquisitione est penetrabilis. Reliqua Deo committenda sunt. Actus enim ex se non cognoscibilis, non est judicabilis. At occulta post diligentem inquisitionem non sunt cognoscibilia. E. Pergit Keckermannus. Quomodo satisfaceret severissimis mandatis divinis. Exod. 22. Maleficos ne finas vivere. & Deut. 19. Non misereberis ejus, & auferes noxium sanguinem de Israël, ut bene sit tibi. Resp. Hæc intelligenda sunt de Maleficis, quorum scelera diligenti inquisitione eruta sunt, aut erui potuerunt, ne sc. illa judex negligentia sua evanescere aut inulta transire sinat. Deut. 13, 14. injungitur judici, ut inquireat diligenter: nec tamen ut per torturam. Ita & Jobus 29, 16. causas, quas non norat, investigabat. Et Daniel in historia Susannæ v. 48. Adeone stulti estis Israël-*

litæ, ut filiam Israël, non disquisita causa, nec aperte cognita, condemnetis? Diligenti igitur inquisitione, sed sine tortura Deus contentus erat. Si quæ vero scelera ita in secreto patrata sint, ut omnem diligentiam iudicis effugerint, illa iudex non tenetur punire, & Deus voluntate contentus est. *Deut. 21, 78.*

Tandem aliud subtilius torturæ genus suadet, sc. VIGILIAS, prout fit in Hollandia, ubi adhibito ad reum custode, qui dormire volentem semper excitet, maximorum scelerum confessiones feliciter extorquentur. Placet hæc opinio etiam Binsfeldio in comm. in tit. C. de Malef. & Mathem. Hippolyto de Marsil. ad l. 1. in princ. n. 55. vers. aliud est tormentum. ff. de Quæstionib. At hæc opinio vix Juridice subsistit, multo minus Philosophice. Non Juridice, quia illi ad essentialia Quæstiones requirunt vim & tormenta corporis. Hinc in Jure usitatissimæ phrasæ, tormenta, torquere, interrogare per tormenta &c. & clarissimus locus. l. item apud. 15. §. quæstionem 41. ff. de injur. Quæstionem intelligere debemus tormenta & CORPORIS DOLOREM ad eruendam veritatem. & post: cum igitur per vim & tormenta habita est quæstio: tunc quæstio intelligitur. At vigiliæ non in se continet dolorem corporis. Non Philosophice, quia vigiliæ nimix homini mentem adimunt, turbant rationem. Tactu enim, pulsione, clamore &c. excitatur sensorium, ut sensus externi quiescere nequeant, atque ita etiam internos moveant. His autem nimium affectis spiritus animales exagitantur, accenduntur & consumuntur, unde tandem sensuum internorum, memoriæ, imo & rationis defectus sequitur. Quis autem deliri confessione in judicando nitetur? Novi quendam inquit Galenus l. 3. de Locis Affectis c. 5. qui ob laborem in studiis atque vigiliis memoriam pene amiserat, læsa etiam ratione. Taceo alios morbos, qui ex nimis vigiliis oriri possunt. Hippoc. l. 2. Aph. 3. Somnus & Vigiliæ, si modum excesserint, malum. & l. 7. Aph. 18. Propter Vigiliam σπασμός ἢ παραφροσύνη, convulsio aut desipientia. Galenus ibid. Maximam vacuan-

cuandi vim habent Vigiliæ atque propterea a siccitate convulsi-
onem adfert & desipientiam. Altera ratio esse potest quia ju-
risdictio Civilis per se non versatur circa actus internos. Ra-
tio est, quia potestas coactiva se eo usque ad interna non ex-
tendit. Cogitationis pœnam inquit Imperator & Pontifex
c. 14. dist. 1. de Poenit. nemo paritur. Cur? quia vis coactiva
quam Philosophus, 10. Eth. c. ult. in omnibus mandatis &
legibus requirit, eo usque se non extendit; neque ad id ut
sensum communem & πρῶτον αἰσθητικόν homo semper in actu
conservet, per quem deinde Spiritus animales derivantur
in sensus externos. Hæc enim sunt supra forma civile; &
homo homini non subicitur secundum animam, sed secun-
dum corpus. Corpora obnoxia sunt & adscripta dominis, mens
sui juris est, inquit Seneca. 3. de benef. c. 20. Potest quidem
aliquando, quatenus connexi sunt externus & internus,
unumquæ actum completum humanum constituunt, indi-
recte & per quandam consecutionem, actum internum
præcipere, sed si iste non sit ultra naturam. Nam sic ἀδυνα-
τήσῃ, inquit Philosophus. c. 1. de som. & Vigil. fatiscet. In-
super nullam habet hæc coacta vigilia proportionem ad
torturam, sic ut dolores corporis habere videntur; est
& contra naturam, vim interioribus animæ potentiis in-
ferre.

Dices. At sæpe militi vigilias injungit Imperator, pu-
nitque si in excubiis dormientem inveniat. Resp. injungit,
sed non supra naturæ vires, ita ut Vis facienda sit sensibus,
sicuti in ejusmodi torturis. Potest enim homo per multas
horas vigilare sine naturæ gravamine; præcipue metu per-
cussus, & ubi periculum imminet. Rariores enim tum
vapores ascendunt, sensum communem occludentes. At
ut per aliquos dies infomnis perduret, fieri vix potest.
Omnia ἐγὼ κατὰ φύσιν, inquit Philosophus l. de somno &
vigilia, simul ac temporis modum excesserint, lascescant suc-
cumbantque oportet.

Atque

Atque hæc sunt, quæ de materia præsentī meditari volumus; non eo fine, ut consuetudinem inveteratam abrogaremus: neque enim tam obtusi *gestamus pectora* Pœni: scimus semper *Præcticos* Jctos jus tractaturos, quatenus manu & constitutionibus teneretur, sed quia nobis, qui Philosophiam juris *theoretice* scrutamur, & quatenus *ratione* *tentur*, altera sententia videtur *tutior*. Exemplo nobis esse possunt ipsi Jcti, qui sæpe in Praxi aliud observant: si vero deinde *theoretice* rem examinent, diversam sectantur opinionem. Ingenia Studiosorum hoc *paradoxo* tantum exercere volumus exemplo Ciceronis, qui itidem *paradoxa* ludens scripsit; nec semper serio disputavit, imo & Catonis, qui sæpe, *cum in SENATU sententiam diceret, locos graves tractavit, abhorrentes ab hoc usu forensi & publico*. Cur non & nobis in Scholis liceret Studiosos *paradoxo* aliquo proposito ad veritatem indagandam excitare?

COROLARIVM.

AN Magnus ille Jctus BENED. CARPZOV. in *Præct. Criminal. part. 2. quæst. 72. n. 47.* sufficienter assignet poenam tantum *fustigationis* aut *relegationis* extraordinariam incestui inter Patrem & filiam commisso, *si filia, persuasa a Patre, se sine exceptione in omnibus & quibuscunque rebus ipsi morem gerere teneri, copiam sui fecerit?* Neg.



